

Ao Amin'ny Fanatrehany

 Misaotra anao, Rahalahy Neville, homba anao tena betsaka mihitsy anie ny Tompo.

Ary manao ahoana, ry sakaida. Tombontsoa lehibe indray ny tafaverina ato amin'ity tranobe ity izao hariva izao, ka mahatsapa an'ilay Fanatrehan'ny Tompontsika tsy diso mihitsy, araka ny Nanomezany ny teny fikasana. Ary ankehitriny, fantattro fa maro aminareo no nianonana ho an'ny Hafatra kely izao hariva izao, izay tena ankositrahako mihitsy. Ary maro aminareo no mbola tsy maintsy hamily fiara lavitra izao hariva izao, mba handeha hody. Ny sasany efa niala tamin'ny hotelinareo, araka ny azoko. Ary hiezaka izahay ny tsy hihazona anareo ela, koa izany no nahatongavantsika aloha mba ahafahantsika hiala aloha.

² Ary ankehitriny izahay dia, haingana arak'izay vitako mihitsy, hilaza angamba aho rehefa hanomboka isika, nahazo antso vitsivitsy aho tamin'ity tolakandro ity, ahafantarana hoe rahoviana isika no hanomboka eo amin'ireo boky ireo, na ireo toko. Ary heveriko, raha sitraky ny Tompo, fa tiako ny haka, amin'ny fotoana manaraka izay anombohantsika, an'ireo Tombokase Fiton'ny Apokalypsy, sy ireo tombokase araboajanahary. Ary, avy eo raha mahavita ara-potoana isika, dia haka an'ireo tombokase fito ao ivohon'ilay Boky, hitanareo. Ankehitriny, mety mila fotoana kely izany. Hitanareo, misy ireo tombokase fito izay nisokatra; misy ireo loza fito, trompetra fito, ireo fito rehetra ireo; ary ireo tombokase no azontsika alaina voalohany. Fa avy eo ny ao ivohon'ilay Boky voaisy tombokase tamin'ny tombokase fito. Nandre an'ireo feo i Daniela, ireo kotrokorana, fa noraràna tsy hanoratra an'izany. Noraràna tsy hanoratra an'izany i Jaona. Fa voaisy tombokase izany tao ivohon'ilay Boky, izany hoe, taorian'ny nilazana sy nanambarana an'ireo zava-miafina rehetra an'ilay Boky ireo. Mahamarika ianareo fa hoy i Daniela eo hoe, "Ireo zava-miafina amin'ny andron'ireo feo ireo, dia ho voambara ny zava-miafin'Andriamanitra amin'io fotoana io." Hitanareo, "ny zava-miafina," hoe iza Andriamanitra, ahoana fa tonga nofo Izzy, ireo zavatra rehetra ireo dia tokony ho voambara amin'io fotoana io. Ary amin'izay fotoana izay—amin'izay fotoana izay dia vonona isika ho an'ireo Tombokase Fito ao ivohon'ilay Boky, izay tsy voambara tamin'ny olona akory aza, tsy voasoratra tao anatin'ny Baiboly akory aza, saingy tsy maintsy mifanaraka marina tokoa amin'ny sisa amin'ny Baiboly izy ireo, ary heveriko fa ho zavatra lehibe iray izany.

³ Koa ankehitriny dia hiezaka ny handeha haingana isika mba hahavita. Misaotra ny tsirairay avy aminareo nohon'ny

fahatsaram-panahinareo sy ny fanatrehanareo, ary—ary izay rehetra nataonareo, misaotra anareo betsaka tokoa izahay. Ary ankehitriny aho—matoky aho fa tsy hihazona anareo ela loatra izahay izao hariva izao, satria tena manam-paharetana ianareo mipetraka, mitsangana. Nilaza ny vadiko iry aoriana iry, niresaka mikasika ny omaly hariva izy, hoy izy hoe, “Nahita an’ireo vehivavy izay matavy be mihitsy aza aho, nitsangana teo, ary kotsa ny fitafian’izy ireo, nitsangana teo, nandramby ny Teny tsirairay.” Izany no antony itiavako mijanona eo ambanin’ny hosotry ny Fanahy Masina, hoe rehefa tonga ianareo dia miteny ny Fahamarinana mahitsy fo amin’ireo olona ireo, hitanareo, ary tsy misy afa-tsy ny Fahamarinana fotsiny. Ary amin’izay fotoana izay dia afaka miankina amin’Izany izy ireo ka ho mety tsara izany rehetra izany.

⁴ Ankehitriny te-hangataka ny famelànareo vetivety aho. Niala aloha aho aninkeo maraina. Ary tsy mandeha ireo horonam-peo amin’izao fotoana izao, ary izaho—izaho fotsiny afaka fotoana fohy dia hiteny amin’ireo mpandray feo hoe rahoviana no halefa ny horonam-peo. Tiako ny hamarana an’ilay *Fanisana Miverina*, dimy minitra fotsiny ho an’izany, alohan’ny handehanako. Adinoko dia lasa aho, tena liana fotsiny aho aninkeo maraina hany ka lasa tsy niteny na inona na inona nikasika an’ilay izy. Fa, navelako kely ianareo hoe, “Inona ilay fanisana miverina?” Hitanareo? Fantatro fa ao anatin’ny fanisana miverina isika, saingy inona ilay fanisana miverina? Hitanareo? Raha tsy fantatrareo hoe inona ilay fanisana miverina, amin’izay fotoana izay dia hikorontana kely ianareo. Ary noho izany aho—ho tiako ny—ny hanapitra an’izany, fotsiny, ary hiezaka ny ho ao anatin’ilay feo iray ihany izay nisy ahy hamaranana an’io horonam-peo io ankehitriny, mba hivoahan’ilay horonam-peo, *Fanisana Miverina*. Ankehitriny dia mamelà ahy vetivety fotsiny ianareo rehetra, ary te-hamarana an’io horonam-peo io aho. Hanao an’izany vetivety fotsiny ve ianareo, avy eo dia hanomboka eo amin’ilay hafa isika? [Hoy ny fiangonana hoe “Amena.”—Mpand.] Ary ankehitriny—ankehitriny ireo mpanao horonam-peo, raha sitrakareo, dia alefaso ny horonam-peonareo ankehitriny. [Elanelana tsy voaraki-peo—Mpand.]

[Manazava Rahalahy Branham ao amin’ny andalana 4-5 fa natsofony io ampaahany banga io tao amin’ny toriteniny maraina nitondra ny titra hoe *Fanisana Miverina*, araka ny andalana 106-111—Mpand.]

⁵ Vao avy tany amin’ireo toerana samihafa, ary nanana fotoana iray lehibe isika tao amin’ireo hafatra telo farany, niresaka teo amin’ny lohahevitra an’ireo—an’ireo foto-pampianarana samihafa sy ny sisa izay nasehontsika. Mahatsiaro fotsiny aho amin’izao fotoana izao fa tokony hanome toerana kely aho eto, ianareo olona eo amin’ny horonam-peo, mba hanoloana

an'ireo horonam-peonareo. Hiteny aminareo aho rehefa vonona handeha. Eny àry. Ankehitriny, tsy maintsy manara-maso an'ity aho. Ilay izy dia toy ny hoe andiana fanamboamboarana arapomba iray, saingy tsy maintsy mamoaka an'ilay horonam-peo ireo zazalahy ireo. Ary tsy afaka manafangaro azy rehetra izy ireo; raha manao izy ireo, dia tsy hahazo azy ireo olona any ivelany. Noho izany dia tsy maintsy mandray an'ilay izy amin'izao fanao izao isika. Ary raha misy olona iray hivoaka ny efitra fotsiny ka hampahfantatra ahy ao, Junior, rehefa vonona ny hanolo an'ireo horonam-peo izy ireo. Misaotra anareo betsaka indrindra, ry olona, milaza indray aho, nohon'ny fahatsaram-panahinareo rehetra sy ny zavatra rehetra. Eny àry, vonona isika ankehitriny, afaka mandefa azy ireo ianareo.

⁶ Ny Tompo hitahy anareo. Faly isika ny tonga eto amin'ny tabernakla indray izao hariva izao. Hipoka ny toerana miaraka amin'ny olona maro mitsangana indray izao hariva izao, niaraka tamin'ny telo andron'ny...na favoriana intelo. Tiako raha ny olona rehetra izay mihaino an'ity horonam-peo ity, mba ho tian'izy ireo ny hiverina ka haka an'ilay horonam-peon'ny omaly hariva. Ianareo izay any an-tranonareo. Izany dia—izany dia ny dingan'ilay asam-panompoana ankehitriny izay nomen'ny Tompo ahy. Ireo mpitoriteny indrindra no tiako hihaino an'izany alohan'ny hamangiako ny fiangonan'izy ireo sy handehanako any an-tranon'izy ireo. Ankehitriny dia tiako izy ireo mba—mba hahazo an'izany. Ankehitriny, aninkeo maraina isika dia niresaka teo amin'ny lohahevitra mikasika ny *Fanisana Miverina*, ilay Fiangonana vonona ny hiala.

⁷ Ary ankehitriny izao hariva izao, raha sitrak'Andriamanitra, dia hiresaka isika eo amin'ny lohahevitra mikasika ny *Ao Amin'Ny Fanatrehany*. Ary, oh, toy ny ahoana no isaorantsika an'Andriamanitra ny amin'ny tombontsoa izay ahafahantsika tonga ao amin'Ny Fanatrehany. Fa, voalohany, maniry aho ny hamadihanareo rehetra ny Baibolinareo miaraka amiko ao amin'ny Isaia mpaminany, ny toko faha-6-n'ny Isaia mpaminany. Isika rehetra dia mahafantatra fa Isaia dia mpaminany lehibe iray, ary iray amin'ireo mpaminany malaza an'ny androny. Namarana ny fiainany tamin'ny fanatsofana nisaraka tamin'ny tsofa izy, ho an'ny fijoroana vavolombelona iray, ho maritiora iray an'ny herin'Andriamanitra Tsitoha. Ao amin'ny Bokin'ny Isaia, ny toko faha-6, manomboka amin'ny andininy faha-5 aho, mba hamaky. “Dia hoy aho hoe, ‘Lozako!’ Fa...” Hanomboka amin'ny andininy faha-1 angamba aho. Mamelà ahy vetivety. Ndao isika hanomboka amin'ny andininy faha-1 ka hamaky midina hatrany amin'ny andininy faha-8.

*Tamin'ny taona nahafatesan'i Ozia mpanjaka no
nahitako ihany koa ny Tompo nipetraka teo ambonin'ny
seza fiandrianana, avo sy manerinerina, ary ny
ebaneban'akanjony nahafeno ny tempoly.*

Nisy serafima nitsangana teo amboniny: ny tsirairay avy dia nanana elatra enina; ny roa nanaronany ny tavany, ary ny roa nanaronany ny tongony, ary ny roa nanidinany.

Ary niantsoantso nifamaly izy ireo, ka nanao hoe, Masina, masina, masina, ny TOMPO Andriamanitry ny maro: ary feno ny voninahiny ny tany manontolo.

Dia nihorohoro ireo andrim-baravarana nohon'ny feon'izay niantsoantso, ary feno setroka ny trano.

Dia hoy aho hoe, Lozako! fa maty aho; satria lehilahy maloto molotra aho, ary izaho dia mitoetra eo afovoan'ny... olona maloto molotra: fa ny masoko efa nahita ny Mpanjaka, ny TOMPON'ny maro.

Dia nanidina nanatona ahy ny iray tamin'ireo serafima, nitondra vain'afy teny an-tanany, izay nalainy tamin'ny tandra avy teo amin'ny alitara:

Ary napetrany teo amin'ny vavako izany, ka hoy izy, Indro, ity dia efa nikasika ny molotrao; ka dia afaka ny helokao, ary voavela ny fahotanao.

Nandre ny feon'ny Tompo koa aho, nanao hoe, Iza no hirahiko, ary iza no handeha ho anay? Dia hoy aho hoe, Inty aho; iraho aho.

⁸ Enga anie ny Tompo hitahy Ny Teniny. Heveriko fa Soratra iray manaitra indrindra izany. Hitantsika fa, ao amin'ny Fanatrehan'Andriamanitra, dia manaiky ny tenany ho mpanota ny olona. Mety mahatsapa ho tena tsara isika rehefa any ivelany any amin'ireo toerana samihafa, ary mahatsapa toy ny hoe olona tena tsara isika, fa rehefa hany tonga ao amin'ny Fanatrehan'Andriamanitra isika, amin'izay fotoana izay isika dia mahita hoe kely toy ny ahoana isika.

⁹ Nitsangana aho vao tsy ela akory izay niaraka tamin'ny—ny sakazako iray izay nananako tombontsoa ho tarihina teo amin'i Kristy, Bert Call, tany New Hampshire, namana mpihaza iray, nitsangana teo akaikin'ny Cold Brook Falls tany Adirondack izahay, ary tena riandrano iray goavana be izany. Nitondra ny fianakaviako tany aho tamin'ny taon-dasa mba hijery an'izany. Miala lavitra be amin'ny lalana, tsy maintsy mandeha antongotra lavitra ianareo hahatongavana any. Ary rehefa hitanay io rano manga-maitso miraraka miaraka amin'ny tena hery matanjaka avy any an-tendrombohitra io, ary mibooiboika eo ambonin'ireo vatolampy, dia nitsangana teo i Bert ka njery ahy, ary hoy izy hoe, “Oay, ry Billy, manao olona iray hahatsapa ho *tena* kely mihitsy izao,” nandrefy tokony ho ampahefatra ny inch teo amin'ny rantsan-tanany izy. Dia hoy aho hoe, “Marina izany, ry Bert.” Ankehitriny, izany ihany no fantany mikasika ny hoe miditra ao amin'ny Fanatrehan'Andriamanitra, ny mahita ny Famoronany.

¹⁰ Manontany an'ilay lehilahy izay nanoratra ny *Fa Lehibe Ianao* aho, raha tsy niandrandra izy indray alina ka njery an'ireo kintana, hoe lavitra toy ny ahoana izy ireo! Volana vitsy lasa izay, Rahalahy Fred, Rahalahy Wood ary izaho, dia nitsangana niaraka tamin-dRahalahy Mc Anally tany an-tany efitr'i Arizona, nandrefy izahay, nanandrana, kintana iray, hoe akaiky an'ilay hafa toy ny inona izy. Ary tany amin'ny an-tapitrisany sy an-davitrisany maily lavitra, tsy toy ny hoe mihoatra ny ampahefatrty ny inch ny elanelan'ny iray amin'ny hafa. Noho izany dia nanomboka nieritreritra izahay, araka ny porofo siantifika mikasika an'izany, hoe ireo kintana ireo angamba dia mifanalavitra ny tsirairay mihoatra lavitra noho ny analavirantsika azy ireo. Hitanareo ve hoe ahoana ilay izy?

¹¹ Noho izany dia fantatsika hoe kely toy ny ahoana isika rehefa mahafantatra hoe lehibe toy ny ahoana Izzy, ary akaiky toy ny ahoana isika eo am-pidirana eo amin'Ny Fanatrehany. Na ahoana na ahoana, dia manome fiantraikany lehibe foana eo amin'ny olona ny miditra ao amin'ny Fanatrehan'Andriamanitra. Nahita ny fotoana tao amin'ny asam-panompoako aho izay nahitanareo ny Fanatrehan'Andriamanitra tonga tao amin'ny toerana iray ka nitondra olona iray nanatona izany ary nanambara mihitsy ny fiainana tamin'izy ireo, nilaza ny fahotan'izy ireo tamin'ireo karazana fihetsika tsy mendrika rehetra, ary nitondra fahanginana masina iray teo anivon'ny olona izany hany ka nivoaka avy tao amin'ilay laharam-bavaka izy ireo talohan'ny hany nanatonany mba hivavahana, ary nihazakazaka nankeo amin'ny alitara ka nahitsy tamin'Andriamanitra talohan'ny nidirany tao amin'Ny Fanatrehany. Hitanareo, misy zavatra mikasika ny fidirana ao amin'ny Fanatrehan'Andriamanitra, manao zavatra hitranga izany. Efa nahita olona nandry tao amin'ny fandria-marary sy filanjana aho.

¹² Tamin'io hariva io tany Mexico, rehefa nandry tao ambanin'ny bodoфotsy iray ilay zaza kely maty, izay nentin'io reny kely Espanola niakatra io, na reny kely Meksikana, raha ny marina, no nitondra niakatra. Rehefa nahita izy ireo, an'arivony maro ireo olona nahita, angamba dimampolo na dimy arivo amby fito alina tao amin'ny favoriana anankiray, no nahita an'io zaza kely maty io niverina tamin'ny fiainana, torana ireo vehivavy, nanangana ny t  nany ireo olona ka nihiaikiaka. Nahoana? Fantatr'izy ireo fa tsy olombelona iray no afaka nanao an'izany, hoe tao amin'ny Fanatrehan'Andriamanitra Tsitoha izy ireo. Ary nanao zavatra iray hitranga izany.

¹³ Efa nanana tombontsoa nandre lehilahy masina niresaka aho. Voalaza indray mandeha ny mikasika an'i Charles Finney, lehilahy kely bitika, tsy nilanja nihoatra ny teo amin'ny folo amby zato livatra, saingy nanana fomba fiteny tena feno hery izy hany ka... Nanandrana an'ireo famoaham-peo izy indray andro tao amin'ny tranobe iray. Tsy nanana an'ireo fitaovana P.A.

izy ireo tamin'izany. Ary nisy lehilahy iray nanamboatra tao, teny amin'ny lavarangana, na tany amin'ny tafon'ilay toerana, ary nandre an'ilay lehilahy niditra izy, noho izany dia tsy fantany hoe iza izy ireo, nipetraka tsara fotsiny izy. Ary nandeha nanandrana an'ireo famoaham-peo Atoa. Finney. Rehefaavy nandany fotoana betsaka tamin'ny vavaka ho an'io fifohazana izay hataony io izy, dia nanandrana ny feony izy mba hahita hoe ahoana no handehanan'izany. Nandeha nankeo amin'ny polipitra haingana izy, ka nanao hoe, "Mibebaha, fa raha tsy izany dia ho levona!" Ary nolazaina tamin'ny tena hery izany—hery, rehefaavy teo ambanin'ny hosot'Andriamanitra, hany ka nianjeraavy teny an-tampon'ny lavarangana ilay lehilahy, hatreny amin'ny gorodona, na, avy teo an-tampon'ilay tranobe, hatreny amin'ny gorodona.

¹⁴ Nitory ny Filazantsara tamin'ny fomba iray tahaka an'izany izy hany ka nitsangana tany Boston, Massachusetts izy, tao amin'ny bay-window kely iray, satria tsy nisy fiangonana antonona ny vahoakany betsaka. Ary nitsangana teo izy niaraka tamin'ny hery matanjaka tahaka an'izany, ka nitory ny helo ho tena toerana iray, hany ireo lehilahy mpiasa niaraka tamin'ny harony teo ambanin'ny sandriny, ka lavo teny an-dàlambe ary niantsoantso famindrampo. Ao amin'ny Fanatrehan'Andriamanitra! Ireo mpitory teny malaza izay afaka, tamin'ny alàlan'ny Tenin'Andriamanitra, nitondra ny Fanatrehan'Andriamanitra nankao amin'ny mpanatrika iray. Ho lavitra anie ny lehilahy iray izay hany nohamafisina ny fony ka tsy afaka ahafantatra mihitsy ny Fanatrehan'Andriamanitra. Ho lavitra anie izany!

¹⁵ Rehefa ilay olona voalohany, vantany vao nanota izy ary nanao zavatra ratsy, ka rehefa niditra tao amin'ny fanatrehany Andriamanitra, na, niditra tao amin'ny Fanatrehan'Andriamanitra izy hoe, "Adama," dia tsy afaka njoro tao amin'ny Fanatrehan'Andriamanitra izy. Nandositra izy ary nanafina ny tenany tao anaty kirihitra ka nanandrana nandrakotra ny tenany tamin'ny ravin'aviavy iray, satria fantany fa nitsangana tao amin'ny Fanatrehan'i Jehovah izy, ilay Mpamorona. Izany no fihetsik'ilay olona voalohany, rehefaavy nanota izy ka nanandrana ny hiditra tao amin'ny Fanatrehan'Andriamanitra niaraka tamin'ny fahotana teo amin'ny fanahiny. Tsy afaka niafina izy, satria mbola nalefaka. Tsy nihazona tahaka ny amakàny ao amin'ny fon'ny olona amin'izao andro izao ny fahotana, fa tena tonga saina mihitsy izy hoe nitsangana teo anatrehan'ny Mpamorona azy. Ankehitriny, nanafina ny tenany tao anatin'ireo kirihitra izy ary tsy tehivoaka, ary tsy afaka nivoaka raha tsyefa nanao fanomanana iray ho azy Andriamanitra.

¹⁶ Afaka miverina isika, ka maka ao amin'ny Genesisy ny toko faha-17 ary ny andininy faha-

3, rehefa ilay patriarka lehibe, Abrahama, rehefa niditra tao amin'ny Fanatrehan'Andriamanitra izy, ka niresaka taminy Andriamanitra (ao amin'ny toko faha-¹⁷) tamin'ny Anaran'Andriamanitra Tsitoha, dia lavo tamin'ny tavany i Abrahama. Io patriarka lehibe io, mpanompon'Andriamanitra, dia tsy afaka nitsangana tao amin'ny Fanatrehan'Andriamanitra, na dia nanompo Azy nandritry ny dimy amby roapolo taona aza izy, tamimpahatokiana. Fa rehefa niditra tao amin'ny fanatrehany Andriamanitra, dia lavo tamin'ny tavany ilay patriarka satria tsy afaka nitsangana tao amin'ny Fanatrehan'Andriamanitra izy.

¹⁷ Ao amin'ny Eksodosy 3, dia mahita isika fa i Mosesy, ilay mpanompo lehibe sy mpaminanin'Andriamanitra, rehefa tany ambadiky ny tany efitra izy, lehilahy masina iray io lehilahy io. Teraka ho an'ilay tanjona izy. Teraka avy tao an-kibon'ny reniny mba ho mpaminany iray izy. Nanandrana ny hampiasa ny fianarany izy sy hanao ny zavatra rehetra izay vitany mba hanafahany ny olony, satria azony fa izy no tsy maintsy hanafaka ny olony, saingy rehefa azony tamin'ny alàlan'ny fomba fijery teolojika iray izany. Nofanina izy. Nampianarina tsara izy. Afaka nampianatra an'ireo fahendrena Egyptiana izy, izay vahoaka nanan-tsainaindrindra teto amin'izao tontolo izao. Fantany ireo anatiny sy ivelany rehetra. Fantany nanomboka tamin'ny A ka hatramin'ny Z ny Soratra. Fantany ireo teny fikasana izay nataon'Andriamanitra. Fantany tamin'ny fomba fijery ara-tsaina iray izy ireo. Ary izy dia—dia lehilahy miaramila malaza iray. Fa indray andro tany ambadiky ny tany efitra, rehefa niditra tao amin'ny Fanatrehan'Andriamanitra izy, dia nanala ny kirarony izy ka lavo—tamin'ny tongony, nahafantatra fa teo amin'ny tany masina izy. Tsy afaka nitsangana tamin'ny tongony izy rehefa niditra tao amin'ny Fanatrehan'Andriamanitra, lavo tamin'ny tavany tahaka ny nataon'i Abrahama izy. Tsy afaka nitsangana tao amin'ny Fanatrehan'Andriamanitra izy.

¹⁸ Ao amin'ny Eksodosy 19:19, rehefa ilay vahoakanofidian'Andriamanitra hatrany aoriana tany tamin'ny andron'i Abrahama, avy tamin'i Abrahama no tonga Isaka, tamin'i Isaka no tonga Jakoba, avy tamin'i Jakoba no tonga ireo patriarka, ary taona sy taona no namokarana lehilahy masina, lehilahy malaza, vahoaka iraynofidiana, taranaka iraynofidiana, vahoaka iray nohamasinina, masina, ary nanompo an'Andriamanitra nandritry ny fiaianany. Ary indray andro dia hoy Andriamanitra hoe, "Angony eto ny Isirael, hiresaka amin'izy ireo Aho."

¹⁹ Saingy rehefa nidina teo an-tampon'ny Tendrombohitra Sinay Andriamanitra, dia nirehitra ny tendrombohitra manontolo, ary nanidina avy tao amin'izany ny setroka tahaka ny lafaoro iray, ka nierona ny Feon'Andriamanitra, lavo tamin'ny

tavany ny Isirael ka nanao hoe, “Aoka i Mosesy no hiteny, fa tsy Andriamanitra, fandrao maty izahay.” Ny olona, ao amin’ny Fanatrehan’Andriamanitra, dia mahafantatra fa mpanota iray izy! Kanefa izy ireo dia, ny tsirairay avy, voafora araka ny Lalàna. Nitandrina an’ireo didy sy ny zavatra rehetra izy ireo, saingy rehefa niteny Andriamanitra ka niditra tao amin’Ny Fanatrehany izy ireo, dia fantatr’izy ireo fa tany ivelany izy ireo, izy ireo dia—tsy marina izy ireo, nisy zavatra izay tsy ampy tao, satria tao amin’ny Fanatrehan’Andriamanitra izy ireo. Eny. Dia hoy izy ireo hoe, “Aoka i Mosesy no hiteny, fa tsy Andriamanitra, satria raha Andriamanitra no miteny dia ho faty izahay rehetra. Aoka i Mosesy no hiteny aminay.”

²⁰ Tao amin’ny Lioka 5:8, rehefa i Petera...oh, fony izy lehilahy lehibe mafy loha iray, ary lehilahy iray manana fitaomana lehibe, fahefana lehibe izay azontsika. Nitovy tamin’ny mpihetraketraka iray izy, mpanjono malaza iray. Fa rehefa nahita ny fahagagan’Andriamanitra nataon’ny Lehilahy tsotra iray izy, toa tahaka an’izany, dia fantany tamin’io fotoana io fa mila mihoatra ny olona iray ny mandefa an’ireo trondro rehetra ireo ao anatin’ny harato iray teo amin’izay nisy azy, niaraka tamin’ny fianarany rehetra, ny fahalalany mikasika ny fanjonoana, nanjono ny alina manontolo nefo tsy nahazo zavatra iray akory aza. Fa nandre Olona iray izy nanao hoe, “Atsipazo ny haratonao.”

²¹ Ary rehefa nanomboka nisintonia izy, dia nahazo trondro marobe, ka fantany fa olona mpanota iray izy. Dia hoy izy hoe, “Mialà amiko, O Tompo, satria lehilahy mpanota iray aho.” Iza no nilaza an’izany? Masindahy Petera, tao amin’ny Fanatrehan’Andriamanitra, nangataka an’Andriamanitra hiala teo amin’ny fanatrehany, satria nahafantatra ny tenany ho mpanota iray izy.

²² Nahafantatra ny tenany i Abrahama hoe “diso.” Nahafantatra ny tenany i Adama hoe “diso,” izay zanak’Andriamanitra, nahafantatra ny tenany hoe “diso.” Nahafantatra ny tenany i Mosesy hoe “diso.” Isirael, amin’ny maha-fiangonana sy firenena iray, nahafantatra ny tenany hoe “diso.” “Mialà amiko, fa lehilahy mpanota iray aho.” Tsy niezaka izy hilaza hoe, “Ankehitriny, masina aho ka mendrika handray an’ity.” Hoy izy hoe, “Lehilahy mpanota iray aho.”

²³ Indray mandeha ny mpihambo ho mpanaraka fivavahana iray, niaraka tamin’ny teolojiany rehetra izay azony nianarana teo ambanin’ny mpampianatra malaza iray nantsoina hoe Gamaliela, ny anarany dia Saoly avy any Tarsisy, izay fantatsika hoe Paoly, mpivavaka hatrany amin’ny teboka. Fantany ny anatiny sy ivelany rehetra an’ny fivavahan’izy ireo. Fariseo iray amin’ny Fariseo izy, ary Hebreo iray amin’ireo Hebreo. Lehilahy malaza iray izy, nianatra iray, manan-tsaina, lalin-tsaina, nianatra, nihambo fa nahafantatra an’Andriamanitra

hatramin'ny naha-zazakely azy. Fa indray andro teny amin'ny lalany nankany Damaskosy, dia namiratra teo aminy io Andry Afo io ka lavo izy tamin'ny...avy teo amin'ny tongony, teo amin'ny tany, tao anatin'ny vovoka, ka nanao hoe, "Tompo, inona no Tiana hataoko?" Ny fiofanany lehibe rehetra, ny fiofanany lehibe ara-teolojia rehetra, ny fianarany rehetra dia tsy nidika zavatra iray rehefa nitsangana tao amin'ny Fanatrehan'Andriamanitra izy.

²⁴ Te-hijanona iray minitra eto aho ka hilaza fa izay ilay zavatra iray ihany. Mety manana D.D. iray ianareo, Ph.D., na mety ho inona ianareo, mety nandeha tany am-piangonana ianareo hatramin'ny naha-zaza anareo, mety nanao an'ireo hetsika ara-pivavahana rehetra izay misy ianareo, fa vao ao amin'ny Fanatrehan'Andriamanitra indray mandeha ianareo dia hahatsapa ho tena kely ary tsy mikaonty.

²⁵ Fantatr'i Paoly fa diso izy, ary lavo tamin'ny tany izy, teo ambanin'ny fitaomana sy Hery. Rehefa niandrandra izy ka nahita an'ilay tena Andriamanitra izay notorianty, ary... notoheriny, sy noheveriny fa fantany, ka hitany fa diso izy, dia lavo avy tamin'ny tongony, tamin'ny tany, satria tao amin'ny Fanatrehan'Andriamanitra izy. Hitany io Andry Afo io.

²⁶ Ahoana ny amin'i Masindahy Jaona malaza an'ny Apokalypy 1:7, rehefa naseho taminy ilay fahitana, ka njery, ary nandre Feo iray niresaka taminy? Dia nitodika izy mba hijery an'ilay Feo, ka nahita fanaovan-jiro volamena fito. Ary nisy Anankiray nitsangana teo afovoan'ireo fanaovan-jiro volamena fito, niaraka tamin'ny volo tahaka ny volon'ondry, maso tahaka ny lelan'afy, tongotra tahaka ny andry varahina, voasikina sikina volamena iray Izy nanodidina ny tratra, ary Izy dia nantsoina hoe ny Tenin'Andriamanitra. Ary rehefa nandeha niaraka tamin'i Kristy ilay Masindahy Jaona malaza, niankina teo amin'ny Tratrany, rehefa nanao an'ireo zavatra rehetra ireo izy! Araka ny nolazaiko aninkeo maraina, ny asam-panompoan'i Paoly dia nihoatra noho ny iray tamin'izy ireo. Indro, rehefa avy nandeha niaraka tamin'i Jesosy i Jaona, niresaka Taminy, natory niaraka Taminy, nihinana niaraka Taminy, fa rehefa nahita Azy nitsangana teo izy, io toerana nomem-boninahitra io, dia nilaza izy fa lavo tahaka ny olona maty teo an-Tongony. Amena. Eritrereto izany!

²⁷ Afaka tonga any am-piangonana isika ka miresaka ary midera an'Andriamanitra, sy ny sisa, saingy, oh, rahalahy, rehefa mahita Azy tonga isika, dia hisy zavatra hafa ao am-pontsika! Mety mihevitra isika fa manao ny andraikitsika ara-pivavahana amin'ny fandehanana any am-piangonana ka mandoa ny fahafolon-karenantsika. Mety mihevitra isika fa mitandrina an'ireo lalàm-piangonana ka manao tsianjery an'ireo fanekem-pinoana rehetra, fa avelao isika hijery Azy indray mandeha,

miova hatrany amin'ny farany ny zavatra manontolo. Eny, azo antoka izany.

²⁸ Ity lehilahy malaza ity, Masindahy Jaona, lehilahy malaza iray tahaka an'izany, nilaza ny Baiboly ao amin'ny Apokalypsy 1:7, fa "lavo tahaka ny olona maty iray izy." Taorian'ny telo taona sy tapany an'ny fiombonana tamin'i Kristy, izy no anankiray amin'ireo mpanoratra ny Epistily, nanoratra mikasika Azy, nihinana niaraka Taminy teo amin'ny latabatara, natory niaraka Taminy teo am-pandriana, ary niombona Taminy na taiza na taiza Nalehany, fa rehefa nitodika mba hijery Azy izy, dia tsy nanana aina intsony tao anatin'y. Lavo teo amin'ny gorodona tahaka ny olona maty iray izy, na teo amin'ny tany. Eny àry.

²⁹ Mahita an'i Isaia isika, ao amin'ny Isaia 6:5, araka ny vao avy novakantsika, io mpaminany mahery malaza io, izy no anankiray amin'ireo mpaminany malaza indrindra izay misy ao amin'ny Baiboly. Misy Boky enina amby enimpolo ao amin'ny Baiboly; misy toko enina amby enimpolo ao amin'ny Isaia. Manomboka amin'ny Genesisy ny Isaia, eo afovoan'ny Isaia dia mampiditra ny Testamenta Vaovao izy, ary amin'ny faran'ny Isaia dia mampiditra ny Arivo taona izy; Genesisy marina tokoa, ny Testamenta Vaovao, ary Apokalypsy. Tanteraka! Isaia no anankiray amin'ireo mpaminany lehibe. Fa indray andro dia niankina teo an-tsandrini Ozia ilay mpanjaka malaza izy, nesorina niala taminy i Ozia, ka kivy izy. Lehilahy tena tsara iray izy, lehilahy marina tsara iray izy, satria io mpanjaka marina io (mpanjaka tsara iray) dia nanaiky azy ho lehilahy masina iray ka nihazona azy tao an-tempoliny.

³⁰ Nahita fahitana i Isaia. Mpaminany iray izy. Nitory ny Teny i Isaia. Mpitoriteny iray izy. Lehilahy masina iray i Isaia. Fa indray andro, nitsangana tao an-tempoly, dia lavo tao anatin'ny tsy fahatsiarovan-tena izy ka nahita ny Voninahitr'Andriamanitra. Nahita an'ireo Anjely niaraka tamin'ny elatra nanarona ny Tavany izy, elatra nanarona ny Tongony, nanidina niaraka tamin'ny elatra, niantsoantso hoe, "Masina, masina, masina ny Tompo Andriamanitra Tsitoha!"

³¹ Fantatr'ilay mpaminany fa tsinontsinona izy. Hoy izy hoe, "Lozako, fa lehilahy maloto molotra iray aho." Mpaminany iray, mpaminany iray mahery indrindra ao amin'ny Baiboly, anankiray amin'izy ireo. "Lehilahy iray maloto molotra aho, ary mitoetra eo anivon'ny olona izay maloto molotra. Lozako, satria mahita ny Voninahitr'Andriamanitra aho."

³² Ary nilaza izy, rehefa niantsoantso io Anjely io, "fa nihovitrovitra nandroso sy niverina ireo andrin'ny tempoly." Rahalahy, izany dia hanao anareo...Tsy ireo andrin'ny tempoly fotsiny ihany no hihovitrovitra, fa ny lanitra sy ny tany manontolo no hihovitrovitra rehefa tonga indray Izy. Handositra ireo tendrombohitra, ary hanjavona ny ranomasina,

ka hiantsoantso hoe, "Afeno amin'ny tavan'ilay mipetraka eo ambonin'ny Seza fiandrianana izahay." Ho fotoana iray mahatsiravina izany. Teneniko aminareo, ry sakaiza mpanota, tsaratsara kokoa aminareo ny mandini-tena. Marina izany.

³³ Ankehitriny, hoy i Isaia hoe, "Lozako, lehilahy iray maloto molotra aho, ary mitoetra eo anivon'ny olona maloto. Ary izaho dia, ireto olona ireto dia manana molotra maloto."

³⁴ Tsarovy ankehitriny, raha lehilahy masina tahaka an'izany no nahafantatra ny tenany ho "mpanota" tao amin'ny Fanatrehan'Andriamanitra, dia inona no hataon'ilay mpanota sy tsy masina amin'izany Andro izany? Inona no hataon'ireo olona izay nипetraka tao amin'ireo fivoriana? Inona no hataon'ireo olona izay nahita ny Herin'Andriamanitra, izay nandre ny fanisana miverina teo amin'ny Teny, izay nahita an'Andriamanitra naneho ny Tenany, ary (any ankoatry ny aloky ny fisalasalana) ny Soratra rehetra dia tanteraka, ka mbola miezaka foana ny ho any An-danitra nefo tsy nateraka indray sy tsy nandray ny Fanahy Masina? Hoy ny Baiboly hoe, "Raha saiky tsy voavonjy ny olona marina, dia aiza no hisehoan'ny mpanota sy ny tsy masina?" Karazana toerana inona no hitsanganantsika raha mahita an'Andriamanitra maneho ny Tenany eo anatrehantsika mihitsy isika, ary mahita ny Voninahitr'Andriamanitra tahaka ny hitan'ireo lehilahy ireo mihitsy, ka niantsoantso ireo karazan-dehilahy ireo, ireo mpaminany sy olon-kendry izay niorenan'ny Teny? Raha niantsoantso izy ireo, ary lavo tamin'ny tongony, ka nihiaikiaka hoe, "Lehilahy maloto molotra aho, fahalotoana," dia ho inona amin'izany ho an'ilay lehilahy izay tsy hiaiky akory ny fahotany aza? Ho inona izany ho an'ilayadolantsento izay tsy hiaiky ny fahotany na ny azy? Ho inona izany ho an'ilay lehilahy mafy fo izay mihevitra fa mahafantatra betsaka mikasika ny famororan'Andriamanitra mihoatra lavitra noho ny ahafantaran'Andriamanitra Izy tenany? Inona no hitranga amin'ilay lehilahy izay nandany ny fiainany rehetra niezaka handiso ny Baiboly? Aiza no hiseho io zalahy io? Eritrereto izany!

³⁵ Izao no fitoriana filazantsara. Izao no fotoana hanozongozonana ny olona. Izao no fotoana izay nolazain'Andriamanitra hoe ho tonga ny fotoana iray, efa nanozongozona ny Tendrombohitra Sinay indray mandeha Izy saingy hisy fanozongozonana iray indray ho avy, ka Izy "dia tsy hanozongozona ny Tendrombohitra Sinay fotsiny ihany, fa hanozongozona ny zavatra rehetra izay azo hozongozonina Izy." Fa efa voamarikareo ve ny sisa amin'ilay Soratra? "Fa isika dia mandray Fanjakana iray izay tsy azo hozongozonina!" Haleloia! Ny zavatra rehetra izay azo hozongozonina dia hihozongozona. Hihozongozona ny lanitra. Hihozongozona ny tany. "Ny lanitra sy ny tany ho levona, fa ity Teny ity dia

tsy ho levona mihitsy. Satria eo ambonin'ity vatolampy ity no Hanorenako Ny Fiagonako, ka ny vavahadin'ny helo tsy haharesy Azy." Ny zavatra rehetra izay azo hozongozonina dia hihozongozona. Fa isika dia mandray Fanjakana iray dia ny Tenin'Andriamanitra Izy tenany, ary Andriamanitra dia Ny Teniny. Tsy manozongozona ny Tenany Izy. Amena! Oh, oadray! "Fa isika dia mandray Fanjakana iray izay tsy azo hozongozonina," tsy mety mihozongozona izany, hoy i Paoly ilay mpanoratra ny Hebreo.

³⁶ Olona iray tahaka an'izany sy lehilahy iray tahaka an'izany, fotoana iray tahaka an'izany nefä ahoana no tsapan'izy ireo! Isika koa dia manana, ny tenantsika, efa nahita ny Voninahitr'Andriamanitra tahaka ny hitan'ireo lehilahy ireo isika. Azo antoka. Efa nahita an'Izany isika. Efa nahita ny Voninahitr'Andriamanitra tahaka ny nahitan'i Abrahama Azy isika. Efa nahita ny Voninahitr'Andriamanitra tahaka ny nahitan'i Mosesy Azy isika, ilay Andry Afo iray ihany, ilay Herin'Andriamanitra iray ihany, ilay Kristy iray ihany tsi-...manambara ny Tenany, maneho ny Tenany, mihazona Ny Teniny amin'ny andro farany. Ahoana no ahafahantsika manatona arak'izany, ary mandeha ka mandray an'Izany am-pahamaivanana mihitsy? Ahoana no ahafahantsika mandeha eo ka mifikitra amin'ireo fanekem-pinoantsika sy anaram-pianganantsika, nefä tsy mandray ny Tenin'Andriamanitra? Ho inona izany ho antsika amin'izany Andro izany? Ahoana no hitrangan'izany amintsika, rehefa nahita ny Voninahitr'Andriamanitra isika?

³⁷ Hitsangana ny olona sasany ka haneso an'Izany, ny sasany hihomehy an'Izany, ny sasany hiantso an'Izany hoe fanatism, ny sasany miantso an'Izany hoe fifandraisana ara-tsaina, ny sasany miantso an'Izany hoe Belzeboba, ny sasany miantso an'Izany zavatra anankiray na iray hafa. Arak'ireo ohabolana fahiny hoe, "Ny adala dia mandeha miaraka amin'ny kiraro misy fantsika eo amin'izay atahoran'ny Anjely hitsahina." Marina izany. "Ny adala dia nilaza tao am-pony hoe, 'Tsy misy Andriamanitra.'" Rehefa mahita an'Andriamanitra voaseho tanteraka tokoa amin'ny alàlan'Ny Teniny Manokana izy (tsy amin'ny alàlan'ny fanekem-pinoana iray; fa amin'ny alàlan'Ny Teniny), nefä avy eo mandeha eo ambonin'Izany mihitsy ka maneso an'Izany, dia adala iray izy. Satria, izany dia, Andriamanitra dia ny Teny, ary Andriamanitra no nanao ny Tenany mazava teo aminy, nefä izy dia "adala," hoy ny Baiboly. Ho inona izany ho azy rehefa tsy maintsy hitsangana ao amin'io toerana io izy? Izany dia ho-hahatsiravina izany ho an'io lehilahy io amin'izany Andro izany, ilay tsy masina.

³⁸ Ireo mpanota nibebaka, kosa anefa, dia tsy manan-tahotra. Oh, tsia. Ny mpanota iray izay hibebaka, dia fantany fa misy Fanatitra iray feno rà miandry, mba hitsangana eo

amin'ny toerany. Izany no manome fiononana ho ahy. Efa nahita ny voninahitr'Andriamanitra aho. Efa nahatsapa ny Heriny aho. Fantatro ny fikasihan'ny Tànany. Fantatro ny fikasihan'ny Famaizany. Fantatro fa Izy no Andriamanitra. Ary fantatro fa vita ny amiko, saingy misy Anankiray mijoro ho ahy eo. Amena. Misy Anankiray Izay mijoro eo ka manao hoe, "Ray, apetraho eo Amiko ny helony rehetra, satria nanohana Ahy izy teny ambonin'ny tany." Haleloia! Noho izany dia manatona ny Seza fiandrianan'Andriamanitra aho, am-pahasahiana, manana fahasoavana ao am-poko, mba hahafantatra fa tsy tamin'ny alàlan'ireo asa soa, fa tamin'ny alàlan'ny Famindrampony no namonjena ahy. Tsy izay azoko natao, izay azoko nikambanana, izay azoko nolazaina; fa nohon'ny Fahasoavany no Namonjeny ahy.

³⁹ Tsy mahagaga raha ilay poetry izay nahatakatra an'izany, no nihiaikiaka hoe, "Fahasoavana mahagaga, tena mamy ilay feo, izay namonjy mahantra iray tahaka ahy. Very aho fahiny, fa hita aho ankehitriny; jamba, fa mahita aho ankehitriny."

⁴⁰ Ahoana no mba ahafahako handeha any An-danitra? Ahoana no ahafahanareo handeha any An-danitra? Tsy afaka manao an'izany isika, isika, ary tsy misy fomba hanaovantsika an'izany. Fa nisy Anankiray izay nanao ny lâlana. Ary Izy no Lâlana. Ary ahoana no ahatongavantsika hatreto Aminy? Tamin'ny Fanahy iray, Ny Fanahiny, no nanaovana batissa antsika tao amin'ny Vatana iray izay hitsangana tahaka ny fihodinana iray. Hiala amin'ny tany tahaka ny mpanamory sambon-danitra an'izao andro farany izao isika amin'ny finoana an'Andriamanitra. Amena. Azo antoka. Tsy mila manahy ireo mpanota nibebaka, nisy Olona iray eo amin'ny toeran'izy ireo.

⁴¹ Oh, noho izany rehefa avy niditry tao amin'Ny Fanatrehany isika ankehitriny, ka fantatsika fa efa tao amin'Ny Fanatrehany isika, dia nahita Azy nanao an'ireo zavatra izay Nataony fony Izy teto an-tany isika. Ahoana no ahafantanareo ny . . . Ahoana no ahafantanareo ny voaloboka izay jerenareo? Nohon'ny voa izay entiny. Ahoana no ahafantanareo ny fiangonana izay andehananareo? Amin'ny voa izay entiny. Hoy Jesosy hoe, "Izay mino Ahy, ireo asa izay Ataoko no hataony koa. Izao famantarana izao no hanaraka an'ireo izay mino."

⁴² Ankehitriny, hitantsika fa tsy nanendry antsika mba handeha hanao anaram-piangonana mihitsy Izy. Tsy nanendry antsika handeha hanao fanekem-pinoana mihitsy Izy. Fa nampitandrina antsika Izy hanohitra an'izany. "Fa na iza na iza hanaisotra zavatra iray avy amin'Izany na hanampy zavatra iray amin'Izany, dia samy ho esorina, ny anjarany, ao amin'ny Bokin'ny Fiainana." Hitareo?

⁴³ Noho izany, tsy voatendry hanao na inona na inona afa-tsy ny mijanona amin'ity Teny ity isika. Ary raha

nirahin'Andriamanitra ny lehilahy iray, dia hijanona amin'ny Teny izy, satria amin'ny alàlan'Ny Teniny irery ihany no ahafahan'Andriamanitra maniraka. Hitanareo? Hitanareo, tsy maintsy mijanona amin'Ny Teniny Izy. Noho izany rehefa miditra ao amin'Ny Fanatrehany isika, rehefa miditra ao amin'ny Fanatrehan'Andriamanitra indray mandeha ny olona iray, dia miova mandrakizay izy, raha misy fanovàna iray ao aminy. Ankehitriny, misy ireo izay afaka niditra tao amin'ny Fanatrehan'Andriamanitra nefo tsy niraharaha an'Izany. Tsy voatendry ho amin'ny Fiainana izy. Fa raha voafidin'Andriamanitra mialoha izy, vantany vao mandòna ilay hetsika voalohany, dia fantany izany. Izany no mandrehitra ny afo.

⁴⁴ Jereo ilay mpivarotena kely tany tamin'io andro io tao Samaria, io vehivavy io. Tao anatin'ny toerana ratsy ara-tsaina sy ara-batana izy. Fantatsika izany. Fa vantany vao hitany natao io famantarana io, ny amin'ny Mesia, dia hoy izy hoe, “Fantatray fa ho avy ny Mesia hanao an’izao. Tsy maintsy ho ny Mpaminaniny Ianao.”

Hoy Izy hoe, “Izaho io Mesia izay voasoratra fa ho avy io.”

⁴⁵ Fantany izany. Tsy nametraka fanontaniana iray amboniny intsony izy. Nanomboka haingana niaraka tamin'ilay andraikitra mihitsy izy, mba ahafantatra fa raha nahita an'izany izy ka niditra tao amin'ny Fanatrehan'Andriamanitra, dia tompon'andraikitra izy hiteny amin'ny olon-kafa mikasika an'izany. Haleloia! Marina. Ny olona iray izay miditra ao amin'ny Fanatrehan'Andriamanitra dia tompon'andraikitra eo anatrehan'Andriamanitra, manomboka amin'io minitra io, hiteny amin'ny olon-kafa. Jereo i Abrahama, jereo i Mosesy, jereo i Petera, jereo i Paoly. Tamin'ny fotoana izay nidiran'izy ireo tao amin'ny Fanatrehan'Andriamanitra, no nahafantarany ny tenany hoe “mpanota,” ka nanisy tombokase ny fanambarany tamin'ny ainy. Jereo ilay ramatoa kely, tsy afaka nijanona ela intsony izy, nandeha nankany an-tanàna izy ka niteny tamin'ireo lehilahy hoe, “Avia, hijery an'ilay Lehilahy izay niteny tamiko an'ireo zavatra izay nataoko. Tsy izao ve no Mesia?” Tsy afaka nandà an'Izany izy ireo, satria ara-tSoratra Izany. Izany tokoa. Eny, tsy maintsy manao an'izany izy ireo, ny lehilahy iray, rehefa manana andraikitra iray isika hiteny amin'ireo hafa tahaka ny nataon'i Mosesy, tahaka ny nataon'i Petera, tahaka ny nataon'i Paoly. Taorian'ireo zavatra ireo, nahita an'Izany ianareo ka niditra tao amin'Ny Fanatrehany, dia tompon'andraikitra hitondra an'ilay Hafatra any amin'ny olon-kafa ianareo. Tsy afaka mipetraka tsara fotsiny miaraka amin'Izany ianareo. Tsy maintsy mitondra an'Izany mankany amin'ny olon-kafa ianareo.

⁴⁶ Tsaroako ny anabavy antitra iray izay teto fahiny, ny renindRahalahy Graham Snelling, nipetraka teto mihitsy izy tato amin'ny fiangonana fahiny, ka nihira hoe, “Vao avy niampita

aho! Mihazakazaka aho, mihazakazaka, mihazakazaka, ary vao avy niampita aho ka tsy afaka mipetraka.” Vao avy nahita zavatra iray izy. Nandeha nankany amin’ny fiangonana kely iray an’ny mainty hoditra aho teto tany Louisville, ary nitsangana izy rehetra, nihira hoe, “Miakatra eo amin’ilay Lâlamben’ny Mpanjaka aho, vao avy hitako Izany, ka miakatra amin’ilay Lâlambe aho!”

⁴⁷ Misy zavatra mikasika an’izany, rehefa mahita an’i Kristy ianareo, dia tsy afaka mihazona ny filaminanareo intsony. Olona iray niova ianareo amin’ny sisa amin’ny andronareo, satria rehefa ny fiainana sy Fiainana no tonga miaraka, dia manao Hazavana iray mamiratra izany. Marina. Rehefa mifandray amin’ny tariby ilay takamoa, raha takamoa tsara iray izy, dia tsy maintsy manome hazavana; rehefa tafakambana ny herin’aratra sy ilay takamoa, dia tsy misy na inona na inona hatao afa-tsy ny manaparitaka hazavana. Tsy maintsy manao an’izany ilay izy. Ary rehefa ny lehilahy iray na vehivavy iray no voafidy mialoha ho amin’ny Fiainana Mandrakizay, ka mahita an’ilay herin’aratr’Andriamanitra mahazo an’io takamoa io izy ireo, dia hanaparitaka Hazavana hatraiza hatraiza arak’izay vitany izany. Mety tsy mihoatra ny folo watt ianareo, saingy hanaparitaka an’izay Hazavana anananareo ianareo. Raha tsy dimanjato watt iray ianareo, dia aparitaho ilay Hazavana folo watt. Omeo ny Hazavanareo! “Aoka ny hazavanareo tena hamiratra eo anatrehan’ny olona, mba hahitan’izy ireo ny asa tsaranareo sy hanomezany voninahitra ny Ray izay any Andanitra.” Eny, tompoke.

⁴⁸ Rehefa mifandray amin’Andriamanitra ny lehilahy iray, dia mahafantatra ny tenany izy hoe “tsy tsara.” Ahoana no ahafahan’ny lehilahy iray handeha ka hirehareha hoe goavana toy ny inona izy sy izay rehetra nataony, nefà tsinontsinona izy? Tsinontsinona izy eo am-panombohana. Indray andro tany Memphis, Tennessee, na anankiray . . . Tsy mihevitra aho fa tany Memphis ilay izy. Anankiray tamin’ireo toerana tany ilay izy. Niaraka tamin-dRahalahy Davis aho ary nanao fi—fifohazana iray. Mety Memphis ilay izy. Ary izahay dia, nandeha tao amin’ny kianja malalaka iray, ary izy ireo tao dia nanana, tsy kianja malalaka iray, fa karazana tronom-bakoka iray ilay izy, ary izy ireo dia nanana an’ireo—ireo sarivongana izay azon’izy ireo avy tany amin’ireo ampahany samihafa an’ny tany, samihafa, Hercules sy ny sisa, sy izay nolokoin’ireo artista malaza. Ary avy eo dia nanana an’ilay fanadihadiana izy ireo ny amin’ny lehilahy iray izay nilanja dimampolo amby zato livatra. Mba fantatrareo moa, ohattrinona ny teti-bidiny? Efatra amby valopolo cents. Izay ihany ny aminy. Efatra amby valopolo cents ireo rehetra—ireo singa simika rehetra izay azonareo alaina avy aminy. Manana ranon-tsokay ampy hamafazana tranon’akoho iray fotsiny izy, ary manana ampy, kalsioma kely fotsiny, potasy

kely. Izany rehetra izany dia hamidy efatra amby valopolo cents. Nefa isika dia mikarakara mihitsy an'ity efatra amby valopolo cents ity ka mandrotsirotsy azy.

⁴⁹ Nisy zazalahy roa nitsangana tany, ary ny anankiray njery an'ilay iray hafa, nanao hoe, "Jim, tsy misy vidiny betsaka mihitsy ve isika?"

Hoy izy hoe, "Tsia, tsy misy vidiny isika, ry John."

⁵⁰ Hoy aho hoe, "Saingy andraso iray minitra, ry tovolahy, manana fanahy iray ianareo ao anatiny ao izay misy vidiny izao tontolo izao iray alina, izay efa, afaka ho havotan'ny herin'Andriamanitra, raha hamela an'izany fotsiny ianareo."

⁵¹ Ny olona, rehefa mahita an'ireo zavatra ireo izy, dia tompon'andraikitra hiteny amin'ny hafa. Nahita an'izany aho fony aho mbola zazalahy iray fotsiny. Nandany ny fiainako manontolo teo amin'izany aho. Malahelo fotsiny aho fa tsy manana afa-tsy fiainana anankiray, maniry aho ny hanana iray alina. Raha nanana Mandrakizay iray aho, dia mbola ho tiako foana ny hiteny amin'ny olona ny mikasika an'izany, satria izany no zavatra lehibe indrindra izay hany hitako. Raha hamaky ao amin'ny Ezekiela 33 ianareo, ny toko faha-33-n'ny Ezekiela, dia nisy mpiambina iray nipetraka teo ambonin'ny tilikambo iray, ary tompon'andraikitra amin'ilay tanàna manontolo io mpiambina io. Amena. Ankehitriny, fohazo, fohazo iray minitra ny tenanareo ho amin'ny fieritreretanareo ara-panahy, raha mbola mijanona eo amin'ity Soratra ity aho. Tsy maintsy ho lehilahy iray niofana io mpiambina io. Tsy maintsy fantany izay nataony, any amin'ny halavirana rehetra, vantany vao mipoitra izy ireo, ny fahavaloo, dia afaka mamantatra an'izany izy. Afaka miteny ny famindran'izy ireo izy, afaka miteny ny lokon'izy ireo izy, afaka miteny ny laharana sy ny filaharan'izy ireo izy. Lavitra arak'izay azon'ny mason'olombelona jerena mihitsy, dia afaka mahita an'izany izy. Ary izy no avo kokoa noho ny sisa amin'izy ireo, satria nofanina hahafantatra ny fahavaloo izy. Ary mitaky an'ilay tanàna manontolo eo an-tanàny Andriamanitra. "Ry mpiambina, ahoana ny amin'ny alina?" Haleloia!

⁵² Tahaka an'izany ireo miaramilan'Andriamanitra amin'izao andro izao. Nofanina ho an'ny Teny izy ireo. Rehefa misy zavatra miseho izay manana famiratana kely eo aminy, izay manana zavatra hafa izay tsy Soratra, dia mampitandrina ny fiangonany izy ireo. Ny zavatra rehetra izay tsy Baiboly, ny zavatra rehetra izay tsy—izay tsy tahaka an'Andriamanitra, toy ny hoe manana lasopy sakafo hariva, dihy, sy ny zavatra hafa rehetra, mba handoavana an'ireo pasitera. Ratsy ireny zavatra ireny. Lalao lôtô sy fetin-karatra ao am-piangonana, ratsy izany! Ary ny tena mpiambina eo ambonin'ny rindrina, izay tao amin'ny Fanatrehan'Andriamanitra indray mandeha... Raha tsy eo ambonin'ny rindrina izy, raha natao fotsiny

ho eo ambonin'ny rindrina izy, dia mety tsy ho avo kokoa noho ny sisa amin'ny fiangonana ilay rindrina. Fa raha mpiambina marina iray izy, dia mampakatra azy tanteraka ao anatin'ireo faritra izay tsy ho tratran'ny sisa amin'izy ireo mihitsy Andriamanitra. Fa miambina ny ondry izy, ary mitaky an'izany aminy Andriamanitra! Ny lehilahin'Andriamanitra izay mitsangana ao amin'ny Fanatrehan'Andriamanitra, ka mahafantatra fa Andriamanitra no Andriamanitra, ary mahafantatra fa mihazona Ny Teniny Andriamanitra, ka mandinika an'Andriamanitra maneho ny Tenany sy manao ny Andraikiny ary mihazona Ny Teniny, amin'izay fotoana izay dia tsy mampaninona na rafi-pandaminana na anaram-piangonana firy no miezaka hamotika an'Izany, dia fantany ny laharana sy filaharan'ilay fahavalo. Amena. Fantany izay hotenenina amin'ilay fiangonana, ny tena mpiambina iray.

⁵³ Ary raha niaiky isika fa misy Izy, efa tao amin'Ny Fanatrehany isika, ka niaiky ny fahotantsika, dia voafafa avy tao amin'ny bokin'ny Fahatsiarovany izy ireo. Tsy misy olona afa-tsy Andriamanitra no afaka manao an'izany. Ankehitriny, afaka manao ny zavatra rehetra amiko ianareo, hamela anareo aho, saingy ho tsaroako izany. Raha nanao zavatra iray taminareo aho, hamela ahy ianareo, saingy ho tsaroanareo izany. Fa Andriamanitra dia afaka mamela sy manadino an'izany. Eritrereto izany, "tsy mahatsiaro an'izany akory aza!" Amena. Manao ahy hahatsapa ho tsara izany. Rehefa tsy tsaroana intsony akory aza izany, dia tsy misy na inona na inona afaka manao an'izany afa-tsy Andriamanitra. Tsy misy na inona na inona afa-tsy Andriamanitra no afaka manao an'izany. Izy no nilaza fa Hofafany avy ao amin'ny Bokin'ny fahatsiarovany izany. Izaho tsy afaka manao an'izany, ianareo tsy afaka manao an'izany, satria manana an'ireo taovam-panamboloana kely voafetra fotsiny ihany isika. Fa Izy no tsi-manam-petra, Andriamanitra, afaka manadino tanteraka an'izany Izy hoe tsy natao mihitsy izany. Amena.

⁵⁴ Vehivavy tanora iray no tonga avy tany amin'ny fiangonan'ambanivohitra iray, ary mpitoky teny tamin'ny fanao fahiny iray, mihiakiaka ny rainy, na mambra iray an'ilay fiangonana. Ary noho izany dia nifindra nankany an-tanana izy, ka nifangaro tanteraka tamin'ireo vehivavy tany, ka tsy maintsy nihetsika tahaka ny nataon'izy ireo, sy ireo lamaody. Ary indray andro dia menatra kely izy fa ho avy ny papany sy ny mamany, na ny rainy, raha ny marina, efa maty ny reniny. Noho izany ilay lahy antitra, ny zavatra tokana nataony, dia ny mifoha ny maraina, mihinana ny sakafotrainany ary maka ny Baiboly ka mamaky an'Izany, dia mitomany sy mivavaka ary mihiakiaka mandritry ny andro manontolo, ka mihazakazaka mandroso sy miverina ao amin'ilay efitra, ka saikatra kely ny amin'izany izy. Koa noho izany—

noho izany rehefa amin'ny ora rehetra mandrity ny alina, raha naka ny Baiboly izy, nanomboka namaky an'Izany, dia mitsangana miala eo am-pandriana izy, ary mihorakoraka hoe, "Voninahitra ho an'Andriamanitra! Haleloia! Oh, voninahitra ho an'Andriamanitra!" Mitontontontona fotsiny ka miantsoantso mandrity ny antsasaky ny alina.

⁵⁵ Noho izany indray andro dia handeha hampiala voly an'ireo mambram-piagonany tamin'ny fetin-dite kely iray izy tahaka ny ananan'izy ireo isan'andro, fantatrareo, noho izany dia tsy fantany izay hataony amin'ny rainy. Sady izay koa, dadany ilay izy. Noho izany dia nanapa-kevitra izy fa hametraka azy ao amin'ny efitrano tampony ambony, ka nanao hoe, "Dada, tsy tianao ny ho eo amin'izay misy an'ireo vehivavy ireo, sa tsy izany?"

Hoy izy, "Tsia, tsy mino aho hoe tiako ny manao an'izany."

⁵⁶ Hoy izy hoe, "Eny, hanana an'ireo vehivavin'ny fiangonana izahay eto androany, ary hanana fivoriana kely iray, fivoriam-bavaka kely. Noho izany aho—teneniko aminao, ry dada, nahoana no tsy miakatra fotsiny ao amin'ny efitrano tampony ambony ao ianao?"

Hoy izy, "Mino mihitsy aho fa hataoko izany."

⁵⁷ Noho izany dia hoy izy hoe, "Vakio ity boky mahafinaritra ity." Dia nanome azy jeografia iray izy. Naka ny Baiboliny hiala teo aminy mba hipetrahany tsara. Noho izany dia fantany fa raha mamaky ny Baiboly izy, nahoana, hanomboka hanao tabataba betsaka izy ao ambony ao. Noho izany dia tao ambonin'izy ireo mihitsy izy, fantatrareo, izay nanaovan'izy ireo ny fetiny. Noho izany dia nomeny azy ilay jeografia, nanao hoe, "Mahafinaritra ity. Tokony hamaky azy ianao, ry dada, satria miteny aminao ny fahamarinana rehetra mikasika an'izao tontolo izao izy."

"Oh," hoy izy, "ho faly aho ny hamaky an'ity."

⁵⁸ Noho izany dia hoy izy hoe, "Ankehitriny miakara ianao ao ambony ao ka mipetraha tsara mihitsy mandra-pialan'ireo vehivavy ireo, ary avy eo aho dia... midina indray ianao ka afaka manao izay rehetra tianao atao avy eo." Nanaiky ny hanao an'izany izy. Noho izany dia niakatra tany ambony izy, nipetraka tao ambony tao.

⁵⁹ Ary nanao ny fetin-diteny izy rehetra, fantatrareo, niresaka mikasika *an'izao-sy-izao*, ary fantatrareo hoe ahoana ny fandehany, nanana an'io fotoana goavana rehetra io. Ary saiky tamin'io fotoana io dia nisy zavatra nitraotra tao ambony, ny fikiakiahana sy fitsambakinana rehetra, ka nilatsaka ilay lalotra sokay. Nihazakazaka nandroso sy niverina nanerana an'ilay efitrano tampony ambony haingana arak'izay azony nandehanana ilay lahy antitra, nitsambikina ambony sy ambany, ka mihorakoraka hoe, "Voninahitra ho an'Andriamanitra! Voninahitra ho an'Andriamanitra!" Tsy fantatr'ireo vehivavy

izay nitranga tao ambony tao, izay nananan'izy ireo tao ambony. Noho izany dia nidina avy hatrany teo amin'ny tohatra izy, haingana arak'izay azony nandehanana.

Hoy izy hoe, “Dada, jeografia iray no nomeko anao ho vakiana.”

⁶⁰ Hoy izy, “Eny, fantatro izany. Fantatralo,” hoy izy, “namaky aho tao amin’ity jeografia eto ity fa misy toerana ao anatin’ny ranomasina izay tsy misy fanambaniny ao anatiny.” Dia hoy izy, “Namaky aho tato amin’ny Baiboly omaly, hoe Izy no nilaza fa Izy no nametraka ny fahotako ao anatin’ny ‘ranomasin’ny fanadinoina.’ Vominahitra ho an’Andriamanitra! . . . ? . . .” Hoy izy, “Mbola mandeha foana izy ireo. Tsy manana fiafarana iray izy ireo, manohy mandeha fotsiny izy ireo.” Marina izany. Dia nihiaikiaka mikasika an’izany izy. Eny, marina izany.

⁶¹ Andriamanitra dia mametraka ny fahotantsika ao anatin’ny ranomasin’ny fanadinoina, mamafa azy ireny, ary toy ny hoe tsy nitranga mihitsy aza izy ireo. Oh, oadray! Noho izany isika dia mitsangana nohon’ny fahasooavan’Andriamanitra, amin’ny alàlan’i Jesosy Kristy Tompontsika, madio sy masina, masina mihitsy tahaka Azy, satria tsy mahita ahy Izy rehefa tonga eo aho, mahita Ny Zanany Manokana Izy. Ny fomba tokana Ahafahany mahita . . . tsy ahafahany mahita ahy, dia satria ao amin’Ny Zanany aho. Ary Ny Zanany irery ihany no Hitany. Tsy mahafinaritra ve izany? Tsy mila mierireritra ny amin’ny fahotana intsony isika, efa lasa izany rehetra izany, eo ambanin’ny Rà izany. Eny, tompoko. Tsy mila manahy ny amin’izany intsony isika, nivoaka daholo izany, ary nivoaka avy tao amin’ny fahatsiarovan’Andriamanitra. Tsy Tsaroany intsony akory aza izany.

⁶² Isaia, io mpaminany mahery io, rehefa niaiky ny fahotany izy, dia hoy izy hoe, “Lozako, fa lehilahy maloto molotra aho.” Mpaminany iray! “Lehilahy maloto molotra aho, ary maloto ny fiangonako.” Hitanareo? “Ireo olona izay itoriako teny, maloto izy ireo. Izaho maloto. Ary lozako. Fa indro tonga ny andian’Anjely iray midina avy any amin’ny Vominahitr’Andriamanitra, manosika an’ireo—ireo rahona, ary miandranda any ambony aho ka mahita ny Ebaneban’akanjony mamenno ny Lanitra manontolo. Ary mandinika an’ireo Anjely ireo aho izay tsy nahafantatra mihitsy hoe inona ny fahotana. Tsy fantatr’izy ireo mihitsy hoe inona ny fahotana, ary teo, tao amin’ny Fanatrehan’Andriamanitra, nanana elatra roa izy ireo nanarona ny tavany, nanana elatra roa izy ireo nanarona ny tongony, ary nanidina tamin’ny elatra roa izy ireo, ka niantsoantso andro aman’alina hoe, ‘Masina, masina, masina ny Tompo Andriamanitra.’” Fioo. Hanao anareo hahatsapa ho tsy masina izany, sa tsy izany? Ankehitriny, inona no nataony? Hoy izy hoe, “Lozako.”

⁶³ Ary rehefa niaiky ny fahotany izy ka nanao hoe “lozako,” dia nanatona ilay Anjely ka nitondra tandra, naka vain’afy izay nameho ny Fanahy Masina sy ny Afo, ary nanatona ka nametraka an’izany teo amin’ny molotr’ilay mpaminany, ary nanao hoe, “Efa nanadio anao Aho.” Tamin’izay fotoana izay ireo elatra izay nikopakopaka tahaka an’izao, dia nanosika an’ireo lamban’efitry ny fotoana, ka nandre an’Andriamanitra izy nanao hoe, “Iza no handeha ho Anay?”

⁶⁴ Fa rehefa avy nahita izy fa nisy fomba iray hanesorana ny fahotana, dia nila olona iray handeha ho Azy Andriamanitra, ka hoy izy hoe, “Inty aho, iraho aho.” Efa tao amin’ny Fanatrehan’Andriamanitra izy, sy niaiky ny fahotany, ary nodiovina ho afaka tamin’ny fahotany, dia vonona ho an’ny asa. Amena.

⁶⁵ Raha nahatakatra an’izany ilay poetry, dia nanao hoe:

An-tapitrisany ankehitriny no eo am-pahafatesana ao anatin’ny fahotana sy henatra,
Henoy ny antsony mampalahelo sy mangidy;
Faingàna, rahalahy, faingàna hamonjy azy ireo;
Mamalia haingana hoe, “Tompo, inty aho.”

⁶⁶ Rehefa mieritreritra an’i Afrika aho, Inde, ary manerana an’izao tontolo izao, mpanompo sampy an-tapitrisany no mihiakiaka sy miantsoantsa famindrampo, ka iza no handeha? Tsy mizara trakta iray ho azy ireny, fa mitondra an’i Jesosy Kristy ho azy ireo. Nisy olona iray tao amin’Ny Fanatrehany, tahaka an’i Mosesy, izay afaka nandeha nidina tany ka naneho tamin’izy ireo ny fanafahana marina. Tsy manao azy ireo hikambana amin’ny fiangonana iray, na mandray tànana sy hanana fanekem-pinoana iray, fa mitondra fanafahana ho an’ny fanahin’izy ireo; lehilahy masina tsara iray. Eny, niaiky ny fahotany i Isaia ka voadio.

⁶⁷ Rehefa avy nitolona nandrity ny alina manontolo i Jakoba, niaiky ny fahotany, tsaroanareo ve ilay toerana nisy azy? Izany dia nantsoina hoe Peniela, P-e-n-i-t-e-l-a, Peniela. Ny teny hoe *Peniela*, amin’ny Hebreo, dia midika hoe “ny tavan’Andriamanitra Tsitoha.” Jakoba, mpisoloky kely dia nandositra nandrity...ny anarany dia *Jakoba*, izay midika hoe “mpamingana,” izany hoe mpamitaka, nandositra nandrity ny fiainany rehetra, lavitra an’Andriamanitra, saingy rehefa niditra tao amin’ny Fanatrehan’Andriamanitra izy indray mandeha tao Peniela, teo anatrehan’Andriamanitra, dia nihazona an’Andriamanitra izy ka tsy namotsotra Azy. Andriamanitra, mila Jakoba betsaka izahay. Namikitra izy teo anatrehan’Andriamanitra, tao amin’ny Fanatrehan’Andriamanitra, nijanona mandrapiposaky ny masoandro izy. Hoy Andriamanitra hoe, “Avelao Aho handeha, satria mipozaka ny masoandro.” Ary nijanona teo

anatrehan'Andriamanitra izy mandra-piposaky ny masoandro, saingy lasa izy nohamarinina sy voavonjy. Hah.

⁶⁸ Oh, zavatra iray lehibe toy ny inona izany, ankehitriny, ny mahafantatra fa nitolona hatramin'ny farany izy. Izany hoe, efa nahita an'ireo famantaran'Andriamanitra izy, efa nanana nofy mikasika an'Andriamanitra izy, saingy ity no fotoana iray izay nisy azy teo anatrehan'Andriamanitra, tao amin'ny Fanatrehan'Andriamanitra. Eritrereto izany, ry sakaiza. Ankehitriny, raha mandeha haingana isika. Ao amin'ny Fanatrehan'Andriamanitra, dia ovaina ny olona iray. Novaina i Jakoba. Ankehitriny dia afaka nandeha niaraka tamin'Andriamanitra izy. Eny, lehilahy hafa iray noho izay naaha-izy azy fony izy nandeha tany izy. Tapitra ankehitriny ilay ady. Eny, tompoko. Dia nanomboka nanorina alitara iray izy. Tsy mbola nanorina alitara izy taloha, fantatrareo. Fa, teneniko aminareeo, rehefa miditra ao amin'ny Fanatrehan'Andriamanitra ianareeo, dia te-hanorina alitara iray ianareo any ho any. Te-hahita ianareo any ho any hoe aiza no ahafahanareo hivavaka. Nanorina alitara iray izy. Nodiovina izy, ary nandresy Andriamanitra.

⁶⁹ Ary Jakoba dia novaina avy tamin'ny *Jakoba*, "mpamingana," lasa *Israely*, "andriana iray, manana hery miaraka amin'Andriamanitra." Izany no nitranga tamin'i Jakoba. Ilay mpamingana, ilay mpamitaka, ilay tsy marina, ilay tsy masina, ilay mpamitaka, namitaka ny rahalahiny, nangalatra ny fizokiana, raha izay ilay izy, tamin'ny rahalahiny, naka fomba maloto kely nanaovana an'izany, tena mpamitaka iray. Namitaka ny rafozan-dahiny izy. Naka tsorakazo pôpôla ka nanao zanak'omby maramara, rehefa tonga teo ireo ombivavy bevohoka, njery an'izany, ary ny ondry...nahita an'io tsorakazo maramara io ka nanao biby fiomby maramara, dia niteraka azy ireo nisy marika. Mpamitaka, namitaka ny rafozan-dahiny manokana. Namitaka ny reniny, namitaka ny dadany, namitaka ny rahalahiny, fa rehefa niditra izy indray mandeha tao amin'ny...Mpisoloky iray izy. Nandositra izy na taiza na taiza nalehany, nandositra an'Andriamanitra isan'andro, nandositra ny rahalahiny izy. Fa rehefa niditra tao amin'ny Fanatrehan'Andriamanitra izy, dia nanaiky izy fa mpanotra iray. Inona no nataony? Inona no nataony? Nahita ny fanararaotrany izy. Nihaona tamin'ny zavatra iray izay tsy noeritreretiny akory aza izy tany aloha, ka nianona teo mandra-pahalasan'ny fahotana rehetra. Oh, oadray! Nitondra azy tao amin'Ny Fanatrehany Manokana Andriamanitra.

⁷⁰ Mikarakara fomba iray Andriamanitra hitondra ny olona ao amin'ny Fanatrehan'izy ireo, avy eo dia mandray ny fanapahankeviny izy ireo. Ny sasany amin'izy ireo mihazakazaka miala Aminy, ny sasany mihazakazaka manatona Azy. Raha voafidy mialoha ho amin'ny Fiainana izy ireo, dia mino an'Izany,

mifikitra eo amin'Izany. Raha tsy izany izy ireo, dia miezaka ny hanalavitra ka hanao hoe, "Tsy misy na inona na inona amin'Izany." Hitanareo? Ary izany ilay zalahy izay very. "Ilay zalahy izay miaiky ny fahotany, no hahazo famelàna. Raha manafina ny fahotanareo ianareo, dia tsy hambinina." Tsia.

⁷¹ Noho izany i Jakoba rehefa izy, fantatrareo, ny ampitso dia nihaona tamin'i Esao rahalahiny izy. Tsy nila fanampiana avy taminy izy tamin'izany. Tsy nila an'ireo tafiny izy. Tao amin'ny asa fanorenana alitara izy. Tsy natahotra an'i Esao intsony izy.

⁷² Salamo 16:8, hoy i Davida hoe, "Apetrako eo anatrehako ny Tompo." Izany no zavatra tsara hatao. Salamo 16:8, "Apetrako eo anatrehako ny Tompo." Noho izany, dia tsy afaka nigorontana mikasika an'izany izy. Te-ho tonga saina ny amin'Ny Fanatrehany izy, noho izany dia hoy i Davida hoe, "Apetrako eo anatrehan'ny tavako isan'andro ny Tompo. Ankehitriny izaho, Davida, dia mameetraka ny Tompo eo anatrehan'ny tavako, isan'andro mba ho tonga saina—tonga saina ny amin'ny Fanatrehan'Andriamanitra." Tsy ho lesona tsara iray ho antsika rehetra ve izany izao hariva izao? Apetraho eo anatrehan'ny tavantsika ny Tompo mba hahatonga saina antsika ny amin'Ny Fanatrehany. Apetraho Izy aloha. Nahoana? Apetraho Izy aloha, eo anatrehanareo. Nahoana? Amin'izay fotoana izay dia tsy hanota ianareo rehefa fantatrareo fa ao amin'ny Fanatrehan'Andriamanitra tsy ankitsahatra ianareo. Rehefa fantatrareo fa eo Andriamanitra, dia mitandrina an'izay lazainareo ianareo.

⁷³ Ny olona iray, rehefa mihevitra izy fa lasa Andriamanitra, dia hiteny ratsy izy, hitsiriritra vehivavy izy, izy hanao... hangalatra izy, hanambaka, handainga. Hanao ny zavatra rehetra izy rehefa mihevitra fa tsy mahita azy Andriamanitra. Fa ampidiro ao amin'ny Fanatrehan'Andriamanitra izy, hanajanona an'izany izao ankehitriny izao izy. Hitanareo? Ary hoy i Davida hoe, "Apetrako eo anatrehako isan'andro ny Tompo." Zavatra tsara iray izany. Tsy mahagaga raha nilaza Andriamanitra fa olona iray araka ny Fony Manokana izy. Hanao ny zavatra rehetra ny olona rehefa mihevitra izy fa tsy akaiky Andriamanitra. Fa rehefa fantany fa akaiky Andriamanitra, efa mba nahamarika mpanota iray ve ianareo? Avelao hanatona ny olona masina iray, hanajanona ny teny ratsiny izy, raha manana fanajana iray mihitsy. Hitanareo? Tsy hiteny vazivazy maloto izay ho noteneniny izy. Hitanareo? Hitanareo, hiala amin'izany izy, satria fantany fa ao amin'ny Fanatrehan'Andriamanitra izy, satria mitoetra ao amin'ny tabernakelin'ny Olony Andriamanitra. Hitanareo?

⁷⁴ Rehefa avy nanao an'io i Davida, dia hoy izy hoe, "Hifaly ny foko." Maniry aho ny hamakianareo an'izany, Salamo 16. "Hifaly ny foko, ary hitoetra ao amin'ny fanantenana ny nofoko." Nahoana? Hifaly ny foko satria manana an'Andriamanitra

eo anatrehako isan'andro aho. "Ary hitoetra ao amin'ny fanantenana ny nofoko; raha maty aho, dia hatsangana indray. Satria tsy hahafoy Ny Iray Masiny hahita ny lò Izzy, sady tsy hamela ny Fanahiny ao amin'ny helo Izzy." Hitanareo? Rehefa nametraka an'Andriamanitra teo anatrehany i Davida, ka tonga saina fa ao amin'ny Fanatrehan'Andriamanitra tsy ankitsahatra izy. "Katsaho aloha ny Fanjakan'Andriamanitra."

⁷⁵ Henoy ankehitriny, ry fiangonana, tiako ianareo. Ary tiako ianareo hihaino ahy ankehitriny. Tahaka ny nolazain-dRahalahy McCullough fahiny hoe, "Hilaza zavatra anankiray aho." Apetraho eo anatrehanareo isan'andro ny Tompo, ary aza manao na inona na inona izay tsy hataonareo ao amin'Ny Fanatrehany, satria miambina anareo Izzy. Hitanareo? Ny Tompo dia mitoby manodidina an'ireo izay matahotra Azy. Izzy tsy... Mijanona eo akaikinareo mihitsy Izzy. Ary Fantany ny zavatra rehetra izay ataonareo, ary tsy maintsy mahafantatra an'izany ianareo. Rehefa manomboka miteny lainga iray ianareo, dia aza manao an'izany, tsarovy, mihaino anareo Andriamanitra. Raha manomboka manao fanambakana kely iray ianareo, dia aza manao an'izany, mijery anareo Andriamanitra. Raha manomboka mitondra Ny Anarany foana ianareo, dia aza manao an'izany, mihaino anareo Andriamanitra. Raha manomboka mifoka sigara iray, dia mandinika anareo Izzy. Hitanareo? Ny... Nihira hira iray isika taloha hoe, "Nanerana ny lèlana rehetra nankany amin'ny fonenana marin'ny fanahy, dia misy maso iray mandinika anao; ny dingana tsirairay izay ataonao, dia mifoha io maso lehibe io, misy maso iray mandinika anao." Tsarovy, manaova tahaka an'i Davida, apetraho eo anatrehan'ny tavanareo isan'andro ny Tompo. Amin'izay fotoana izay dia hifaly ny fonareo ary hitoetra ao amin'ny fanantenana ny nofonareo, satria Izzy no nampanantena an'izany. Eny, tompoko. Fantany fa hitsangana izy satria Andriamanitra no nampanantena an'izany. Eny àry.

⁷⁶ Rehefa miditra ao amin'Ny Fanatrehany isika, dia ovaina, tsy tahaka ny taloha intsony. Jereo manerana ny taona rehetra, ny dingan'ny fiainana rehetra, an'ny olona. Jereo i Abrahama. Hoy ianareo hoe, "Eny, ho an'ireo mpitoriteny fotsiny ny fiainana niova." Oh, tsia. Ho an'ny olona rehetra ny fiainana niova. Hitanareo?

⁷⁷ Ankehitriny, mpiompy iray i Abrahama, fa rehefa nandre ny Feon'Andriamanitra niresaka taminy izy, ka nahita an'io fahitana io, dia lehilahy niova iray izy nanomboka tamin'io fotoana io. Nanasaraka ny tenany tamin'ny havany izy, tamin'ny mpiara-miasa aminy rehetra, ka nandeha toy ny mpivahiny sy vahiny iray, tao amin'ny tany hafa iray, tamin'ny sisa tamin'ny fiainany, nitoetra tao anaty tranolay, satria niaiky mazava tsara izy fa nitady tanàna iray izay Andriamanitra no Mpanorina sy Mpanao. Fantany fa nisy Andriamanitra iray, ary nisy

tanàna iray tany ho any Izay Andriamanitra no Mpanorina sy Mpanao. Izany no tenenin'ny Hebreo 11 amintsika, hoe nitady tanàna iray izy izay Andriamanitra no Mpanorina ny Mpanao azy. Olona iray niova izy, kanefa tsinontsinona afatsy mpiompy tsotra iray. Fa nahita fahitana izy ary niditra tao amin'ny Fanatrehan'Andriamanitra, ka lehilahy niova iray izy nanomboka tamin'izany.

⁷⁸ Mosesy, mpiandry ondry iray izy, saingy lehilahy niova iray izy rehefa niditra tao amin'ny Fanatrehan'Andriamanitra. Kanosa iray izy, nandositra an'i Farao izy, niaraka tamin'ny tafika iray manontolo taoriany. Fa niaraka tamin'ny tsorakazo iray teny an-tanany, dia niverina izy ka naka an'ilay firenena manontolo. Hitanareo? Nahoana? Niditra tao amin'ny Fanatrehan'Andriamanitra izy. Lehilahy niova iray izy, mpiandry ondry iray.

⁷⁹ Petera, mpanjono iray, tsy nahafantatra na inona na inona mikasika ny fanjonoana...na tsy nahafantatra na inona na inona mikasika an'Andriamanitra, ny zavatra tokana fantany angamba dia hoe ahoana no hahazoana trondro. Fa rehefa niditra tao amin'ny Fanatrehan'Andriamanitra izy, ka nahita an'ilay Mpamorona lehibe Izay afaka namorona trondro, rehefa niteny taminy Izy mba handatsaka ny harato ho amin'ny fisarihana. Tsy nisy trondro mihitsy tao, vao avy nisintona ny haratony izy. Fa hoy izy hoe, "Nohon'Ny Teninao, Tompo. Mino aho fa Ianao no Zanak'Andriamanitra, ary raha Ianao no mamela...raha alatsako ny harato, Ianao no niteny tamiko hanao an'izany; nohon'Ny Teninao, satria Ianao sy Ny Teninao dia iray ihany, dia alatsako ny harato." Ary rehefa nanomboka nisintona izy, dia hoy izy hoe, "Mialà, Tompo, lehilahy mpanota aho." Hitanareo, mpanjono iray, rehefa avy nihaona tamin'i Kristy i Petera dia tsy nitovy tamin'ny taloha intsony izy. Izy, taorian'izany, dia tena nahatoky tamin'Andriamanitra, nomena azy ireo fanalahidin'ny Fanjakana. Eny, tompoko.

⁸⁰ Paoly, nitonon-tena ho Fariseo iray, nianatra sy nofanina tao amin'ny fivavahana rehetra an'ny...izay nisy tetra amin'izao tontolo izao tamin'izany andro izany, iray amin'ireo manampahaizana ambony indrindra fantatra teo amin'ny firenena. Fa rehefa tonga teo anatrehan'io Andry Afo io izy indray andro, ilay Andriamanitra izay nenjehiny, tamin'ny tsy fahalalana. Fariseo iray izy, tsy nino izy fa Lehilahy iray Andriamanitra. Fantany fa Andriamanitra no ilay Andry Afo, Izany no nitarika ny Olony nivoaka an'i Egypta, Izany no niaraka tamin'izy ireo hatramin'izay. Fa rehefa nahita an'io Andry Afo io izy, dia lavo tamin'ny tavany. Ary nandre Feo iray izy nanao hoe, "Ry Saoly, nahoana ianao no manenjika Ahy?"

Hoy izy, "Iza moa Ianao, Tompo?"

Hoy Izy hoe, "Izaho no Jesosy."

⁸¹ Lehilahy iray izy, izay nanao hoe, "Ahoana no nanaovana batisa anareo?" Efa tao amin'ny Fanatrehan'Andriamanitra izy. Lehilahy niova iray izy nanomboka tamin'izany, efa tao amin'ny Fanatrehan'Andriamanitra izy. Izany no manova lehilahy iray.

⁸² Charles G. Finney, mpisolovava iray, mpisolovava malaza iray an'i Filadelfia, fa rehefa niditra tao amin'ny Fanatrehan'Andriamanitra izy dia navelany ny fianarany lalàna ka lasa mpitory teny iray mahery indrindra izay hany nananan'ity firenena ity izy.

[Elanelana tsy voaraki-peo—Mpand.]...dia mpitory teny iray, satria niditra tao amin'ny Fanatrehan'Andriamanitra izy indray andro. Nieritreritra izy, indray mandeha, fa hianatra ny asam-panompoana izy. Fantatrareo ny bokiny. Manana ny tantaran'ny fainany aho. Nandeha izy mba hivavaka. Nihevitra izy fa mpitory teny iray. Nanana faniriana iray izy, hoe te-hitory teny, ary nanomana toriteny vitsivitsy ho azy izy izay noe Zahany ho toriana. Nandeha izy indray andro, nivoaka ny biraony, mba hivavaka, nandeha nankany anaty ala. Nandohalika tao ambadiky ny hazo antitra nazera iray izy, izay nandehanany isaky ny tolakandro. Tena mpivavaka, saingy tsy nino an'Izany izy.

Nisy vehivavy anankiroa tao am-piangonana, nanohy nilaza hoe, "Atoa. Finney, mivavaka izahay mba handraisanao ny Fanahy Masina."

Hoy izy hoe, "Manana ny Fanahy Masina aho." Hoy izy, "Mpitory teny iray aho."

⁸³ Hoy izy ireo, "Atoa. Finney, lehilahy malaza iray ianao, ary manana fihazonana lehibe an'ny Teny, saingy mila ny Fanahy Masina ianao. Mivavaka ho anao izahay." Vehivavy kely malemy fanahy.

⁸⁴ Noho izany dia nanohy izy, nanohy. Noho izany dia nandeha nankao ambadiky ny biraony isan'andro izy, izay niasany niaraka tamin'ny sefony sy izy rehetra ireo, dia nivoaka ny biraony an'ny mpisolovava izy ary nandeha nivavaka tany. Ary indray andro dia teo am-pivavahana izy tany ka nandre kirihitr'ala iray tapaka. Nihevitra izy fa ny sefony no tonga, nitady azy. Nitsangana haingana mihitsy izy. Hoy izy hoe, "Tompo Andriamanitra, mino Anao aho." Ary tapaka ny kirihitr'ala iray, hoy izy, "Ahm! Ahm! Ahm!" nitsangana ary nilaza, njery manodidina, hahita hoe inona no nanapaka an'ilay kirihitr'ala. Ary tamin'izay fotoana izay izy no niditra tao amin'ny Fanatrehan'Andriamanitra. Fantany fa ho an'ny tanjona iray no nahatapaka an'io kirihitr'ala io. Nitsangana teo izy, nikoriana teo amin'ny takolany ireo ranomaso. Hoy izy hoe, "Marina angamba ny an'ireo vehivavy ireo. Menatra aho raha misy olona iray mahita ahy miresaka amin'Andriamanitro, nefy aho dia nihevitra fa voninahitra ho an'ny olona iray ny mahita

ahy miresaka amin'ny sefoko. Tsy lehibe noho ny sefoko ve ny Tompoko!" Hoy izy, "Tompo, mamele ahy ka fenoy ny Fanahy Masina aho," nanomboka niantsoantso sy nihiaikiaka. Tao amin'ny Fanatrehan'Andriamanitra izy. Nihazakazaka haingana mihitsy nankany an-tanàna nankao amin'ny biraony izy. Tsy maintsy niantsoantso tena mafy izy ka tsy maintsy nandeha tao ambadiky ny varavarana, nanao hoe, "Tompo, hitondra fahafaham-baraka ho Anao aho. Afeno eto ambadika eto aho mandra-pandresiko an'io fahavoazana io." Nahoana? Niditra tao amin'ny Fanatrehan'Andriamanitra izy. Lehilahy niova iray izy. Ireo toriteny izay notoriandy fahiny, ireo toriteny iray ireo ihany no notoriandy ka nanatona ny alitara ireo fanahy. Hitanareo, efa tao amin'ny Fanatrehan'Andriamanitra izy.

⁸⁵ Moody, mpanao kiraro antitra kely iray, zara raha nahafantatra ny ABD-ny. Marina izany. Nahantra ny gramerany. Nisy olona niteny taminy indray andro hoe, "Tena mahantre mihitsy ny grameranao, Atoa. Moody."

Hoy izy hoe, "Saingy mahazo fanahy amin'izany aho." Noho izany...

⁸⁶ Indray andro ireo gazety, lasa ilay tonian-dahatsoratra nanoratra an'ilay gazety. Lasa izy mba hijery hoe ahoana no nahafahan'io lehilahy io nihazona vahoaka marobe eo ambanin'izany toerana izany, zalahy antitra kely, sola loha, sy ny sisa, ary nanana volombava nihantona nidina ambany, karazana mibontsin-kibo, ary lehilahy iray mahatsiravina jerena izy. Noho izany dia nanome azy tsikera iray marina tokoa io gazety io, nanao hoe, "Tsy hitako hoe inona marina no mety ho hitan'ny olona ao amin'i Dwight Moody." Hoy izy, "Ratsy tarehy izy, mikiakiaka ny feony, manana volombava midina hatrany amin'ny valahany izy, sola loha tahaka ny voatavo iray izy." Dia hoy izy, "Ahoana marina no mba handehanan'ny olona hahita zavatra ao amin'i Moody?"

⁸⁷ Noho izany dia sendra nahita an'izany ilay mpikarakara an'i Moody, hoy izy, "Jereo, Atoa. Moody, hamaky an'ity ho anao aho." Tsy nahay namaky an'izany irery i Moody. Noho izany dia hoy izy hoe, "Hovakiako aminao ilay lahatsoratra." Ary izany no nosoratany.

⁸⁸ Nanainganainga ny sorony fotsiny i Moody, nanao hoe, "Tsia tokoa, tonga mba hijery an'i Kristy izy ireo." Izay ihany. Nahoana? Efa tao amin'ny Fanatrehan'Andriamanitra izy. Avy amin'ny fanamboarana faladian-kiraro, mba hosimbain'ny olona; dia nampikiraro ny olona tamin'ny Filazantsaran'ny fanomanana izy. Nahoana? Tao amin'ny Fanatrehan'Andriamanitra izy. Marina.

⁸⁹ Niditra tao amin'ny Fanatrehan'Andriamanitra ny vehivavy kely iray indray andro, meloka mihitsy arak'izay nahe-izy azy. Tao anatin'ny fotoana fohy dia fantany fa tao amin'ny

Fanatrehan'Andriamanitra izy, voavela ny fahotana rehetra ka tena nadio sy fotsy tahaka ny lisy iray izy. Oh, oadray. Mbola misy firy ny olona azoko antsoina eto, saingy ny fotoana no tsy hamela.

⁹⁰ Fa te-hiresaka kely ny amin'ny tenako fotsiny aho. Inona no mbola mety ho ambany noho izaho? Taiza no nisy ahy? Nivoaka avy tamin'ny fianakavian'ny mamolava, nivoaka avy tao amin'ny fianakavian'ny mpamono olona, nivoaka avy tao amin'ny fianakaviana mpanao toaka sandoka. Ary fantatrareo izany, ny tsirairay avy aminareo dia mahafantatra an'izany, mahafantatra hoe karazana anarana inona no azonay teto. Tsy niresaka taminay ny olona teny an-dàlambe. Nandeha tany antanàna aho, nanomboka niresaka tamin'ny olona iray, tsy nisy olona te-hiresaka tamiko raha tsy nisy olona iray teo. Niresaka tamiko izy ireo, fa raha nisy olon-kafa tonga, dia nilaozan'izy ireo aho. Dia nitsangana teo aho ary nitomany hoe, "Tsia, tsy marina izao, tsy mety ho toy izao ilay izy. Ratsy izao."

⁹¹ Fa indray andro dia niditra tao amin'ny Fanatrehan'Andriamanitra aho. Izy no nanova ahy ka nanao ahy ho karazana zanakalahy iray hafa. Ny Fahasoavany no nampiditra ahy tao amin'Ny Fanatrehany. Tsy te-hiala tao amin'Izany intsony aho. Telopolo taona mahery kely izao no naха-tao ahy ankehitriny. Tsy te-hiala ao amin'Izany aho. Manana antoka aho fa ho Ao foana. Na dia ny fahafatesana izy tenany aza tsy hahasaraka ahy amin'Ny Fanatrehany. Tsia. Hiaraka Aminy mandrakizay aho. Rehefa nahita voalohany Ny Fanatrehany aho, dia niantsoantso tahaka an'i Isaia hoe, "Lozako." Avy eo dia nikasika ahy tamin'ny Fahasoavany Izy. Olona iray niova aho. Ilay jiolahimboto kely izay nivoaka teto taloha ka nanao hadalana sy ny sisa, dia novaina, ary hatramin'io fotoana io dia efa Zanany aho. Hatramin'io fotoana io, dia naniry aho ny hanome ny fiainako manontolo ho an'ny Asany, naniry fotsiny aho ny banana fiainana iray alina amboniny homena Azy. Ity anankiray ity dia trotraka tsara mihitsy ankehitriny, telo amby dimampolo taona izay no lasa. Teo amin'ny telo amby telopolo tamin'izy ireo no efa, na roa amby telopolo tamin'izy ireo no efa tao amin'ny Filazantsara. Maniry aho ny banana arivo iray hafa azoko laniana. Nahoana? Rehefa tao amin'Ny Fanatrehany indray mandeha aho dia nahafantatra fa nisy Olona iray Izay tia an'ilay tsy azo tiavina, nisy Olona iray izay tia ahy nefä tsy nisy iray hafa nitia, nisy Olona iray Izay niahya ahy nefä tsy nisy iray hafa niahya. Apetrako nanodidina ny Hazo fijaliany ny sandriko, nofihiniko teo amiko izany, ka lasa iray izaho sy Izy tamin'izay fotoana izay. Ary nanomboka teo dia tia Azy aho. Nasiany pentimpentina tamin'Ny Ràny ny tratrako sy ny foko, tamin'ny fikasihana ahy sy famelàna ny fahotako, ary faly aho izao hariva izao fa isan'ny Azy. Tsy maniry ny hiala amin'io toeran-Danitra io intsony aho,

na dia niezaka nandresy lahatra ahy matetika aza ilay mpaka fanahy; fa voaaro ao anatin'ny tranolain'Andriamanitra aho, ary faly ao amin'ny Fitaviavany sy ny fahasoavany, ka miaina ao amin'ilay lafin'ny haleloia. Oadray! Manao ny foko hifaly izany.

⁹² Manoro Azy aho ho an'ny olona sasatra rehetra. Manoro Azy aho ho anareo izay tsy manana fanantenana. Ianareo izay tsy mbola tao amin'Ny Fanatrehany mihitsy, ny zavatra tokana tokony hataonareo dia ny miaiky ny fahotanareo ka mahafantatra fa diso ianareo, ary Andriamanitra no nanendry an'io Anjely io izao hariva izao, antsoina hoe ny Fanahy Masina, mba hanaisotra ny fahotanareo rehetra. Avy eo hiantsoantso ianareo hoe, "Tompo, inty aho, iraho aho." Avy eo dia hanangana ny tanganareo ianareo ka hihira hoe, "Ho deraiko Izy! Ho deraiko Izy! Derao ilay Zanak'ondry voavono ho an'ny mpanota. Omeo voninahitra Izy, ianareo olona rehetra, fa Ny Ràny no nanadio ny pentimpentina tsirairay." Tiako Izy. Ary ianareo? Velona ao amin'Ny Fanatrehany!

⁹³ Tonga teto amin'ny polipitra aho aninkeo maraina, nahatsapa ho ratsy sy tena naharary nohon'ny... Izaho—tany Kentucky aho tamin'ny herinandro lasa niaraka tamin'ireo sakaizako manokana sasantsasany mipetraka eto. Raha nijanona ela tany aho, dia ho namono ahy izy ireo, azo antoka fa ho namono izy ireo, niaraka tamin'ny fahatsaram-panahy, ny sasany amin'ireo mpahandro tsara indrindra izay hany fantattro teo amin'ny fiainako. Ary rehefa tonga teo amin'ny fatrako aho, dia diso voky loatra, "Rahalahy Branham, tsy haka sasantsasany amin'ity ve ianao?" Ary tena tsara fotsiny izany, miezaka manery azy hidina fotsiny aho. Tena voky aho ka tsy afaka nihetsika mihitsy akory aza. Izaho—tsy afaka natory aho, ary nifoha sy nandehandeha vetivety. Ary tsy nahatsapa ho tena tsara mihitsy aho rehefa tonga teto aninkeo maraina. Fa rehefa niditra tao amin'Ny Fanatrehany indray mandeha aho, dia nilamina hatreо ilay izy. Nilamina hatreо ilay izy, nanjavona daholo izany avy eo. Marina izany. Oh, ny miaina ao amin'Ny Fanatrehany!

Ho deraiko Izy, ho deraiko Izy,
Derao ilay Zanak'ondry voavono ho an'ny
mpanota;
Omeo voninahitra Izy ianareo olona rehetra,
Fa Ny Ràny no nanasa ny pentimpentina tsirairay.

Ndao isika hanondrika ny lohantsika ankehitriny.

[Misamomononona ny Ho Deraiko Izy Rahalahy Branham—Mpand.]

Satria nanao betsaka ho ahy Izy;
Namela ny fahadisoako Izy;
Ary Ny Ràny no nanasa ny fahotako.

Ho deraiko Izy, ho deraiko Izy,
 Derao ilay Zanak'ondry voavono ho an'ny
 mpanota;
 Omeo voninahitra Izy ianareo olona rehetra,
 Fa Ny Ràny no nanasa ny pentimpentina tsirairay.

[Misamonomonona ny Ho Deraiko Izy Rahalahy Branham—Mpand.]

⁹⁴ Ankehitriny raha ato ianareo izao hariva izao... Ary fantattro fa eto Ny Fanatrehany. Nitsangana tao anatin'ny tao vao teo, ho an'ny zazavavy kely an'ny Fianganan'Andriamanitra, tonga teo amiko ny Fanahy Masina rehefa nivavaka ho an'io ankizy kely io aho. Avy tany amin'ny tobin'ny Anderson Church of God ireo raiamandreny. Ary ilay mpanara-maso tany, nahafantatra an'ilay ankizy, hoy ireo dokotera hoe "mety... tsy maintsy maty avy hatrany izy, miaraka amin'ny leucémie." Ilay zazavavy kely, mamy kely, ao amin'ireo dingany farany ankehitriny. Tonga tao ambadika tao izy ary nanatsotra ny sandry keliny tamiko, nivonto tanteraka ilay izy, noho ireo fanjaitra sy ny sisa tao anatin'ny, ary mangana. Nojereko izy, nahita fahitana iray aho. Vao avy namaky boky iray ireo raiamandreny tany. Tsy nahafantatra na inona na inona mikasika an'izany izy ireo. Ilay mpanara-maso ambony tany amin'ilay toby tany no niteny tamin'izy ireo, nilaza mba hitondra an'ilay ankizy eto. Tian'izy ireo ny hiverina rehefa nanana asampanasiranana iray isika. Dia hoy aho hoe, "Ento ilay ankizy ankehitriny," nahatsapa ho voatarika.

⁹⁵ Rehefa nitsangana tao mihitsy aho, dia niverina ny Fanahy Masina ka namoaka ny tantaran'ilay ankizy. Niteny ny rehetra mikasika ny hoe ahoana no nitrangan'ilay izy, inona no nataon'izy ireo. Niteny fa ny fanirian'ilay zazavavy kely, dia ny ho mpitendry piano. Ary saiky nihiakiaka fotsiny io reny io. Dia hoy io dada io hoe, "Izany no fahamarinan'Andriamanitra." Mipetraka ao anatin'ny fiara ankehitriny mihaino an'izany, tsy afaka niditra, mipetraka ao ivelany ao mihaino an'izany ankehitriny.

⁹⁶ Nisy voalin'aloka goavana iray tonga nihantona teo ambonin'ilay ankizy. Dia hoy aho hoe, "Satana, resy ianao." "Tsy manavaka olona Ianao, Andriamanitra. Ka amin'ny alàlan'ny herin'ny Fitsangananao, ary amin'ny maha-Mpanomponao, no androahako an'io devoly io hiala amin'ilay ankizy." Nanjelatra teo an-tampony ny Hazavana mamiratra goavana iray, tapitra ilay izy. Amena. Hah? Azo antoka, mendrika ny dera rehetra Izy!

⁹⁷ Fantany ny zavatra rehetra. Fantany ny fonareo. Ary fantatrareo izay eritreretinareo; Izy dia mahafantatra, ihany koa. Raha misy fahotana kely miabantona eo aminareeo izao hariva izao, ka tsy tianareo ny hiditra ao amin'ny Fanatrehan'Andriamanitra miaraka amin'izany eo aminareeo,

dia tianareo ve ny hanangana indray mandeha indray ny tānanareo ka hanao hoe, "Rahalahy Branham, mivavaha ho ahy, te-ho ao amin'Ny Fanatrehany aho amin'io Andro io, tsy meloka." Andriamanitra hitahy anareo. Tānana maro, hitan'Andriamanitra izany. Ao amin'Ny Fanatrehany. Ankehitriny dia hoteneniko aminareo izay hatao. Henoy tsara fotsiny ankehitriny. Manaova tahaka ny nataon'i Davida, apetraho eo alohanareo ny Tompo izao ankehitriny izao. Apetraho eo anelanelanareo sy io fahotana io ny Tompo, na inona na inona io fahotana kely manafika io. Mety ho lainga ilay izy, mety ho halatra, mety eritreri-dratsy ilay izy, mety ho fahatezerana ilay izy, mety ho fisotroana, mety ho fifohana, mety ho filokāna. Tsy fantatro hoe inona. Mety ho fitsiriritana. Mety ho zavatra iray izany. Tsy fantatro hoe inona ilay izy. Na inona na inona ilay izy, dia apetraho eo anatrehanareo ny Tompo. Ary amin'izay fotoana izay dia hifaly ny fonareo, ary hitoetra amin'ny fanantenana ny nofonareo, satria fantatrareo fa Kristy no nampanantena fa hanangana indray Izy amin'ny andro farany. Rehefa miseho Izy, dia ho lasa araka ny Endriny isika. Tsy hanao an'izany ve ianareo ankehitriny, raha mivavaka isika?

⁹⁸ Ry Rainay any An-danitra, Hafatra kely iray tapatapaka avy tamin'ny mpanompo trotraka iray. Fa mieritreritra fotsiny eo amin'ny lohahevitra hoe "mitoetra ao amin'ny Fanatrehan'Andriamanitra." Ary hitanay izao hariva izao ny fiantraikany izay nentin'izany teo amin'ireo lehilahy masina mba hiditra ao amin'Ny Fanatrehanao, inona no fiantraikany nananan'izany teo amin'izy ireo. Olo-kendry, mpaminamy mahery lehibe notendren'Andriamanitra, ary nirahina history ny Teny, kanefa nihaona Taminy nifanatrika ka lavo tamin'ny tany tahaka ny lehilahy maty iray. Inona no hataonay amin'izany andro izany, Tompo? Nieritreritra tsara an'izany izahay. Efa nieritreritra an'izany izahay. Tānana efapolo na dimampolo no efa nieritreritra an'izany, Tompo, satria nanangana ny tānany fotsiny izy ireo, na ireo fo ao ambanin'ilay tānana, efa nieritreritra mikasika ny mihaona Aminy hatramin'ny niresahanay. Inona no hataon'izy ireo raha tsy maintsy hihaona Aminy?

⁹⁹ Ny tānako, Tompo, dia mitsangana. Inona no hataoko? Ankehitriny, Ray, manana zavatra ratsy maro izay ataoko aho. Vao avy niaiky ny fahotako teo anatrehan'ny fiangonana aho aninkeo maraina, tahaka ny niaikeko an'izany Tamiao teo an-tampon'ny tendrombohitra indray maraina rehefa nandrivotra ny andro ka nanoram-panala, ary tany an-tampon'ny tendrombohitra tany, hoe toy ny ahoana no nitarainako sy nangatahako Anao mba hamela ahy nohon'ny hadalako. Ary toy ny ahoana no natahorako ho tonga teo anatrehan'ireo rahalahiko, izay ny sasany amin'izy ireo dia

mihevitra ahy ho Mpaminany-mpanomponao. Ary, Tompo, halako toy ny ahoana ny ho tonga teo anatrehan'izy ireo ka hiteny amin'izy ireo ny amin'ny hetsika adala iray hoe nanao zavatra tahaka an'izany aho, saingy, Andriamanitra, tsara ho an'ny fanahiko ny miaiky ny fahotako ka tsy manafina azy ireny. Noho izany mba hahitsy fo Aminao, ary teto anatrehan'ny olona mihitsy, dia efa niaiky an'izany aho, Tompo. Diso aho, diso tanteraka aho. Mangataka famelàna aho.

¹⁰⁰ Ary avy eo, Ray, efa nitaredretra mikasika Anao aho, nanompo Anao, imbetsaka angamba aho no afaka nandeha lavitra kokoa nefä tsy nataoko izany. Ray, miaiky ny fahotako aho. Mila an'ilay Anjelin'Andriamanitra aho hanadio an'izany hiala amiko, amin'ny alàlan'ny Ràn'i Jesosy. Misy tànana hafa nitsangana izao hariva izao, ny sasany tamin'izy ireo angamba tsy mbola nangataka famelàna mihitsy tany aloha; saingy azoko antoka ny amin'ity zavatra anankiray ity, raha hiaiky ny fahotanay izahay, dia hokosehan'Andriamanitra izy ireny, hapetrany ao anatin'ny ranomasin'ny fanadinoana ary tsy hahatsiaro azy ireny—ireny intsony. Ary, Ray, satria miaiky ny ahy aho, mikasika ny fitondran-tena ratsy teo anatrehan'ireo olona ireo, tsy nitondra ny tenako toy ny mpanompon'i Kristy iray aho. Tsy nanao aho. Natahotra aho sao mety ho tezitra amiko io olona io ary nihevitra fa tsy te-handratra ny fihetseham-pony aho, nefä tsy nihevitra an'izay nataoko Taminao, Tompo. Ary ankehitriny aho—mivavaka aho mba Hamelanao ahy. Ary ankehitriny, Ray, fantatro fa raha mangataka famelàna aho dia mahazo famelàna, ka Ianao no nametraka azy ireo tao amin'ny ranomasin'ny fanadinoana, ary tsy hahatsiaro an'izany intsony mihitsy Ianao. Andriamanitra, mankasitraka aho ny amin'izany.

¹⁰¹ Ary mivavaka aho mba Hamelanao ny olona rehetra eto, izay nanota, fahotana manafika ny zavatra rehetra eo anatrehan'izy ireo, enga anie izy ireo hanaisotra an'izany ka hametraka ny Tompo eo anatrehan'izy ireo tahaka ny nataoni'i Davida. Satria miantsoantso izahay ankehitriny hoe, "Lozako, fa nahita ny Vominahitr'Andriamanitra aho. Lehilahy maloto molotra aho, na vehivavy na zazavavy maloto molotra, zazalahy, na zavatra iray." Na mety ho inona na inona izahay, dia maloto, ary mangataka ny Ràn'i Jesosy Kristy izahay, ilay Fanatitra mifantenana, mba hanadio anay ho afaka amin'ny fahotana rehetra, mba ahafahanay hany hitoetra ao amin'Ny Fanatrehany. Avelao izahay handeha hiala eto izao hariva izao miaraka amin'ny fonay mifaly, sy ny nofonay mitoetra amin'ny fanantenana, mahafantatra an'izao, hoe rehefa tonga Jesosy, dia hatsangana miaraka Aminy araka ny Endriny izahay, ka hitsena Azy eny amin'ny habakabaka, ao amin'ny Fampakarana, rehefa tapitra ny fanisana miverina amin'ny farany. Hitanay fa efa voaisa ilay taom-pianganana fahafito, ary vonona ny

hiainga izahay ankehitriny. Mivavaka izahay, Andriamanitra, mba Ianao, alohan'ny Hanakatonanao ny varavarana, raha misy anankiray eto izao hariva izao izay tsy mbola nuditra mihitsy, enga anie izy ireo hiditra haingana mihitsy, satria tsapanay fa ny varavarana'ny famindrampo, eo anelanelan'ny famindrampo sy ny fitsarana, dia eo am-pikattonana. Ireo izay hanaiky ny famindrampo no hiditra. Ireo izay tsy hiditra dia tsy maintsy hiaritra fitsarana. Manakatona ny varavarana Andriamanitra. Enga anie tsy hisy varavarana iray hikatona izao hariva izao ho an'ny tsirairay avy amin'ireo izay miaiky fa mpanota. Enga anie izahay rehetra hahazo famelâna sy famindrampo. Amin'ny Anaran'i Jesosy Kristy.

¹⁰² Ary ankehitriny, Ray, ho an'ny marary sy ny ory, ho an'ireo manana ilaina, dia mivavaka aho mba ny Fahasoavanao no hanome an'izay rehetra ilain'izy ireo. Enga anie izy ireo hiditra ao amin'i Kristy, ao amin'Ny Fanatrehany. Hametraka an'i Kristy, Kristy, ilay teny fikasana hoe, “Izy dia voalefona nohon'ny heloko,’ izany hoe ny fahotako. ‘Tamin’ireo Dian-kapony no nahasitranana ahy,’ noho izany dia apetrako eo anatrehan'ny aretiko ny Tompo. ‘Izy no eo ankavanako, ka tsy hangozohozo aho,’ noho izany dia mandroso am-pahasahiana aho, miaiky fa sitrana. ‘Tamin’ireo Dian-kapony no nahasitranana ahy.’” Ekeo izany, Tompo, ho an'ny tsirairay avy amin'izy ireo. Ary fantatray fa raha miaiky amin'ny fonay izahay sy, na amin'ny molotray, ka mino ao am-ponay, amin'izay fotoana izay dia azonay ny faniranay.

¹⁰³ Hoy Ianao hoe, “Rehefa milaza zavatra iray ianareo, dia minoa fa miseho izany, dia afaka mahazo an'izay nolazainareo ianareo.” Mino an'izany izahay, Ray, ary mino fa hanadio anay ho afaka amin'ny fahotanay rehetra Ianao, ka hanasitranana ny aretinay rehetra, ary hanome fahasooavana ho anay, Tompo, mba hanompoana Anao.

¹⁰⁴ Mombà an'ireto olona ireto. Maro amin'izy ireo no hanao dia ao amin'ireo lâlana maizina izao hariva izao. Maro amin'izy ireo no hanao dia maily maro. Aza mamela na inona na inona hitranga amin'izy ireo, Tompo. Tonga nanerana ny firenena izy ireo mba hipetraka eto hihaino an'ilay fanisana miverina, hahita hoe akaiky ny andro farany toy ny ahoana izahay. Ankehitriny dia efa nangataka azy ireo aho mba handeha, hametraka an'Andriamanitra eo anatrehan'izy ireo, eo anatrehan'izy ireo isan'andro, alohan'ny zavatra hafa rehetra. Alohan'ny dian'izy ireo, alohan'ny hetsik'izy ireo, alohan'ny... alohan'ny ifohazan'izy ireo, rehefa avy matory izy ireo, alohan'ny atorian'izy ireo isan'andro, na aiza na aiza izany, hametraka an'Andriamanitra aloha! “Fa eo ankavanako Izy, dia tsy hangozohozo aho.” Noho izany dia enga anie hifaly ny fon'izy ireo, mba hahafantatra fa azon'izy ireo izay nangatahany, satria Andriamanitra no nampanantena an'izany, ary hitoetra amin'ny

fanantenana ny nofon'izy ireo. Ekeo izany, Tompo, fa mangataka an'izany amin'ny Anaran'i Jesosy Kristy izahay. Amena.

Ho deraiko Izzy, ho deraiko Izzy,
Derao ilay Zanak'ondry voavono ho an'ny
mpanota;
Omeo voninahitra Izzy ianareo olona rehetra,
Fa Ny Ràny no nanasa ny pentimpentina tsirairay.

¹⁰⁵ Ankehitriny dia mino ve ianareo fa nametraka ny Tompo teo anelanelanareo sy ny fahotanareo, teo anelanelanareo sy ny aretinareo, teo anelanelanareo sy ny fahadisoanareo, teo anelanelanareo sy ny lalanareo? “Eo anatrehako mandrakariva ny Tompo, ary ao amin’Ny Fanatrehany aho. Amin’ny manaraka raha manomboka mandrehitra sigara iray aho, dia eo anatrehako ny Tompo. Amin’ny manaraka raha manomboka mitsiriritta aho, dia eo anatrehako ny Tompo. Amin’ny manaraka raha manomboka miteny zavatra ratsy aho, dia eo anatrehako ny Tompo. Amin’ny manaraka raha manomboka milaza zavatra ratsy iray aho, dia eo anatrehako ny Tompo. Ary tsy hangozohozo aho. Amena. Hiaina ao amin’Ny Fanatrehany isan’andro aho, amin’ireo raharahako, isan’andro amin’ny firesahako. Handeha aho toy ny hoe eo anatrehako ny Tompo, satria nametraka Azy teo anatrehako aho izao hariva izao. Tsy hangozohozo aho.” Tianareo ve Izzy?

¹⁰⁶ Ankehitriny, ndao isika hitsangana ankehitriny. Oh, mahatsapa ho tena tsara mihitsy aho. Tsapako toy ny hoe tsy te-handeha hody mihitsy aho. Ary fantatrareo fa vao amin’ny sivy latsaka dimy amby roapolo minitra fotsiny izao, eo amin’ny adiny roa aloha aho. Tsy mahafinaritra ve izany? Oh, oadray! Fa ankehitriny raha miala isika, aoka ho tsaroantsika, fa tsy maintsy mitondra ny Anaran'i Jesosy eo amintsika isika, ho ampinga iray amin’ny fandrika rehetra. Ka rehefa miangona manodidina antsika ny fakam-panahy...miezaka hihazona antsika hahatsiaro an'izany, dia bitsiho am-bavaka fotsiny io Anarana masina io.

Raiso eo aminao ny Anaran'i Jesosy,
Ry zanaky ny alahelo sy fahoriane;
Hanome fifaliana sy fiononana ho anao Izany,
Oh, raiso Izany na aiza na aiza alehanao.

Anarana Sarobidy, (Anarana Sarobidy!) O tena
mamy!
Fanantenan'ny tany sy fifalian'ny Lanitra;
Anarana Sarobidy, (Anarana Sarobidy!) O tena
mamy!
Fanantenan'ny tany sy fifalian'ny Lanitra.

¹⁰⁷ Firy no mankasitraka ny pasiterantsika, Rahalahy Neville? [Hoy ny fiangonana hoe, “Amena.”—Mpand.] Tsy misaotra ny Tompo ve ianareo nohon’ny lehilahy tsara iray, mahitsy

fo, isan'andro, mino ny Filazantsara? [“Amena.”] Ary manao asa iray tena mahafinaritra izy amin’ny fankatoavana an’ireo Didin’Andriamanitra, sy mitory ny Teny ary mihazona an’izao rivo-piainana ara-panahy lehibe izao ato amin’ny fiangonana isan’andro. Tsarovy, nandeha nidina tany amin’ny Morontsiraka Atsinanana aho, nandeha nitety ny Atsimo, ary niakatra ny Morontsiraka Andrefana, sy nanerana an’i Canada, fa tsy nihaona tamin’ny fiangonana anankiray izay ara-panahy tahaka an’ity fiangonana eto ity mihitsy aho. Lasa nankany amin’ny voa izy ireo, hia, na fanatisma, na nandeha tao amin’ny fifandonana, na tena nangatsiaka ka tsy azo hetsehina fotsiny. Izay ihany.

¹⁰⁸ Ankehitriny, mifankatia ve ianareo? [Hoy ny fiangonana hoe, “Amena.”—Mpand.] Oh, mifandraisa tànana, ka manaova hoe, “Deraina ny Tompo.”

¹⁰⁹ [Mandray tànana ny olona Rahalahy Branham—Mpand.] Deraina ny Tompo. Deraina ny Tompo. Deraina ny Tompo. Deraina ny Tompo, ranabavy. Deraina ny Tompo. Faly aho fa tetu ianao, rahalahy. Deraina ny Tompo, ranabavy. Andriamanitra hitahy anao. Eny àry. Andriamanitra hitahy anao. Hanao izahay. Andriamanitra hitahy anao. Fantro izay ilainao. Andriamanitra hitahy anao. Andriamanitra hitahy anao.

Raiso eo aminao ny Anaran’i Jesosy,
 Ho Ampinga amin’ny fandrika rehetra;
 Rehefa miangona manodidina anao ny fakam-
 panahy, (Inona no ataonareo?)
 Bitsiho am-bavaka io Anarana Masina io.
 Anarana Sarobidy, (Anarana Sarobidy!) O tena
 mamy! (O tena mamy!)
 Fanantenan’ny tany sy fifalian’ny Lanitra;
 Anarana Sarobidy, (Anarana Sarobidy!) O tena
 mamy!
 Fanantenan’ny tany sy fifalian’ny Lanitra.

¹¹⁰ Ndao isika hanondrika ny lohantsika ankehitriny. Tena malefaka, aoka tsy ho adinoointsika izany ankehitriny. Ndao isika hihira an’io andininy io indray.

Raiso eo aminao ny Anaran’i Jesosy, (Ho an’ny
 inona?)
 Ho Ampinga amin’ny fandrika rehetra; (Rehefa
 miezaka mamandrika anareo i Satana.)
 Rehefa miangona manodidina anao ny fakam-
 panahy, (Inona no ataonareo?)
 Bitsiho fotsiny io Anarana Masina io...
 (“Satria eo anatrehan’ny tavako ny Tompo; tsy
 hangozohozo aho!”)
 Anarana Sarobidy, (Anarana Sarobidy!) O tena
 mamy!

Rahalahy Neville.



Ao AMIN'NY FANATREHANY MAG62-0909E
(In His Presence)

Ity Hafatr'i Rahalahy William Marrion Branham ity, izay notoriana tamin'ny Teny Anglisy ny Alahady hariva, 9 Septambra, 1962, tao amin'ny Branham Tabernacle ao Jeffersonville, Indiana, U.S.A., dia nalaina avy tamin'ny horonam-peo ary natonta manontolo amin'ny Teny Anglisy. Ity fandikana amin'ny Teny Malagasy ity dia natonta sy nozarain'ny Voice Of God Recordings.

MALAGASY

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-printy ao an-trano ho an'ny fampiasana manokana na ho zaraina, tsy misy sarany, ho fitaovana iray hanaparitahana ny Filazantsaran'i Jesosy Kristy. Ity boky ity dia tsy azo amidy, na adika indray amin'ny refy lehibe, na alefa amin'ny siteweb iray, na tehirizina amin'ny fomba nisy nanesorana, na adika amin'ny fiteny hafa, na ampiasaina ho fangataham-bola raha tsy misy alàlana voasoratra mazava avy amin'ny Voice Of God Recordings®.

Ho an'ny fanazavana fanampiny na ho an'ny fitaovana hafa efa azo raisina, dia iangaviana hifandray amin'ny:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org